

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY
YAMAMOTO
NOV 21 1958

T 5237.47/1332

5

唐詩類苑卷第一百二十九

明雲間張之象玄超甫纂輯

雲間姜雲龍神超甫編次

雲間王徹叔朗甫補訂

梁谿曹仁孫伯安甫校正

人部

閨情

謝秀才有妾編練改從於人秀才引畱之不得後生感憶座人製詩嘲誚賀復繼四首

李賀

哈佛大學漢和藏印

誰知泥憶雲望斷梨花春荷絲製機練竹葉剪花裙
月明啼阿姊燈暗會良人也識君夫婿金魚挂在身
二

銅鏡立青鸞燕脂拂紫綿腮花弄暗粉眼尾淚侵寒
碧玉破不復瑤琴重撥絃今日非昔日何人敢正看
三

洞房思不禁蜂子作花心灰暖殘香炷髮冷青蟲簪
夜遙燈焰短睡熟小屏深好作鴛鴦夢南城罷擣碓
四

尋常輕宋玉今日嫁文鴛戟幹橫龍箴刀環倚桂牕

邀人裁半袖端坐據胡牀淚濕紅輪重栖烏上井梁

爲薛嵩送紅線

冷朝陽

潞州節度使薛嵩有青衣善彈阮咸琴又通經史
嵩俾其掌牋表號曰內記室以其手紋隱起如紅
線因以名之一日辭去嵩知不可留乃廣爲餞別
悉集賓友夜宴中堂嵩以歌送紅線酒請座客冷
朝陽爲詞

採菱歌怨木蘭舟送客魂銷百尺樓還似洛妃乘霧
去碧天無際水東流

山遊示小妓

白居易

雙鬟垂未合三十纔過半本是綺羅人今為山水伴
春前共揮弄好樹同攀翫笑容花底迷酒思風前亂
紅凝舞袖急黛慘歌聲緩莫唱楊柳枝無腸與君斷

毆妓

李建勳

自為專房甚忽忽有所傷當時心已悔徹夜手猶香
恨枕堆雲髻啼襟搵月黃起來猶忍惡剪破繡鴛鴦

懷良人

女郎葛鵝兒

蓬鬢荆釵世所稀布裙猶是嫁時衣胡麻好種無人
種正是歸時不見歸

獻陳陶處士

豫章蓮花妓

蓮花為號玉為腮珍重尚書遣妾來處士不生巫峽
夢虛勞神女下陽臺

答蓮花妓

陳陶

近來詩思清於水老大心情薄似雲已向昇天得門
戶錦衾深媿卓文君

與牛家妓樂雨夜合宴

白居易

玉管清絃聲旖旎翠釵紅袖坐參差兩家合奏洞房
夜八月連陰秋雨時歌臉有情凝睇久舞腰無力轉
裙遲人間歡樂無過此上界西方即不知

命妓不至

劉兼

琴中難挑孰憐才獨對良宵酒數杯蘇子黑貂將已
敝宋弘青鳥又空回月穿淨牖霜成隙風卷殘花錦
作堆欹枕夢魂何處去醉和春色入天台

光威哀姊妹三人少孤而始妍乃有是作精
粹難儔雖謝家聯雪何以加之有客自京

師來者示予

朱樓影直日當午玉樹陰低月已三光膩粉暗銷銀

鏤合錯刀閑剪泥金衫威繡牀怕引烏龍吠錦字愁

教青鳥銜哀百味鍊來憐益母千花開處鬪宜男光

鴛鴦有伴誰能羨鸚鵡無言我自慙威浪喜遊蜂飛

撲撲佯驚孤鵲語喃喃哀偏憐愛數蠶螭掌每憶光

抽玳瑁簪光烟洞幾年悲尚在星橋一夕悵空含威

牕前時節羞虛擲世上風流笑苦諳哀獨結香綃偷

餉送暗垂檀袖學通叅光須知化石心難定却是爲

雲分易甘威看見風光零落盡絃聲猶逐望江南哀

次光威哀韻

魚玄機

昔聞南國容華少今日東隣姊妹三粧閣相看鸚鵡
賦碧牕應繡鳳凰衫紅芳滿院參差折綠醕盈杯次
第銜恐向瑤池曾作女謫來塵世未爲男文姬有貌
終堪比西子無言我更慙一曲艷歌琴杳杳四絃輕

唐詩類苑 卷之二百三十一
撥語喃喃當臺競鬪青絲髮對月爭誇白玉簪小有
洞中松露滴大羅天上柳烟含但能爲雨心長在不
怕吹簫事未諳阿母幾嗔花下語潘郎曾向夢中參
暫持清句魂猶斷若覩紅顏死亦甘悵望佳人何處
在行雲歸北又歸南

兵部尚書席上作

杜牧

華堂今日綺筵開誰召分司御史來偶發狂言驚滿
坐兩行紅粉一時回

席上贈人

故桂府榮陽公席上出家妓

李商隱

淡雲輕雨

一作淡煙微雨

拂高唐玉殿秋來夜正長

一作一曲清聲

遠盡

料得也應憐宋玉一生唯事

一作只應無柰

楚襄王

望行人

張籍

秋風牕下起旅鴈向南飛日日出門望家家行客歸
無因見邊使空待寄寒衣獨倚青樓暮烟深鳥雀稀
結素魚貽友人

李冶

尺素如殘雪結爲雙鯉魚欲知心裏事看取腹中書
得閻伯鈞書

李冶

情來對鏡懶梳頭暮雨蕭蕭庭樹秋莫怪欄杆垂玉
筯只緣惆悵對銀鈎

唐僖宗自內出袍千領賜塞外吏士神策軍
馬真於袍中得金鎖一枚詩一首

僖宗宮人

玉燭製袍夜金刀呵手裁鎖寄千里客鎖心終不開
莫愁

李商隱

雪中梅下與誰期梅雪相兼一萬枝若是石城無艇
子莫愁還自有愁時

倣崔輔國體三首

韓偓

淡月照中夜海棠花自落獨立俯閑堦風動秋千索

二

酒力滋睡眸鹵莽聞街鼓欲明天更寒東風打牕雨

三

羅幕生春寒繡牕愁未眠夜半南湖雨應濕採蓮船

效長吉

李商隱

長長漢殿眉窄窄楚宮衣鏡好鸞空舞簾疎燕誤飛
君王不可問昨夜約黃歸

夜意

李商隱

簾垂幕半捲枕冷被仍香如何爲相憶魂夢過瀟湘
冬至夜懷湘靈

白居易

艷質無由見寒衾不可親何堪最長夜俱作獨眠人

半夜

韓偓

板閣數樽後至今猶酒杯一宵相見事半夜獨眠時
明朝牕下照應有髮如絲

昨夜

李商隱

不辭鴟鳩妬年芳但惜流塵暗燭房昨夜西池涼露
滿桂花吹斷月中香

夜宴曲

施肩吾

闌缸如晝買不眠玉爐夜起沈香烟青娥一行十二
仙欲笑不笑桃花燃碧牕弄嬌梳洗晚戶外不知雲
漢轉被郎嗔罰屠酥盞酒入四肢紅玉軟

邯鄲主人

王建

遠客無主人夜投邯鄲市飛蛾繞殘燭半夜人醉起
墟邊酒家女遺我緗綺被合成雙鳳花宛轉不相離
縱令顏色改勿遣合歡異一念始為難萬金誰足貴
門前長安道去者如流水晨風羣鳥翔徘徊別離此

追賦畫江潭苑四首

李賀

吳苑曉蒼蒼宮衣水濺黃小鬟紅粉薄騎馬珮珠長
路指臺城迴羅薰袴褶香行雲霑翠輦今日似襄王

二

寶抹菊衣單蕉花密露寒水光蘭澤葉帶重剪刀錢

角暖盤弓易鞞長上馬難淚痕霜寢帳勻粉照金鞍
三

剪翅小鷹斜緝根玉鏃花鞦垂粧鈿粟箭箠釘文牙
鸞鸞啼深竹鷓鴣老濕沙宮官燒蠟火飛燼汚鉛華

四

十騎簇芙蓉宮衣小隊紅練香燠宋鵲尋箭踏盧龍
旗濕金鈴重霜乾玉鐙空今朝畫眉早不待景陽鐘

江風行

張朝

壻貧如珠玉壻富如埃塵貧時不忘舊富日多寵新
妾本富家女與君為偶匹念汝一何深中門不曾出

妾有繡衣裳葳蕤金縷光念君貧且賤易此從遠方
遠方三千里發去悔不已日暮情更來空望去時水
孟夏麥始秀江上多南風商賈歸欲盡君今尚巴東
巴東有巫山窈窕神女顏常恐遊此方果然不知還

題玉泉溪

湘驛女子

紅葉醉秋色碧溪彈夜弦佳期不可再風雨杳如年

西溪

李商隱

悵望西溪水潺湲柰爾何不驚春物少只覺夕陽多
色染妖韶柳光含窈窕蘿人間從到海天上莫為河
鳳女彈瑤瑟龍孫撼玉珂京華他夜夢好好寄雲波

石首縣聽砧

盧延遜

因携一家住贏得半年吟深閨乍冷鑑開篋玉筍微
微濕紅頰一陣霜風殺柳條濃烟半夜成黃葉垂垂
白練明如雪獨下間堦轉淒切祇知抱杵搗秋砧不
覺高天已無月時聞寒鴈聲相喚紗牕只有燈相伴
幾度金刀試剪裁離腸恐逐金刀斷細想儀形執牙
尺回刀剪破澄江色愁捻銀針信手縫惆悵無人試
寬窄時時舉淚拭紅牋紅牋謾有千千字書中不盡
心中事一半殷勤寄邊使

河陽詩

李商隱

黃龍搖溶天上來玉樓影近中天臺龍頭瀉酒客壽
杯主人淺笑紅玫瑰梓澤東來七十里長溝複塹埋
雲子可惜秋眸一鬢光漢陵走馬黃塵起南浦老魚
腥古涎真珠密字芙蓉篇湘中寄到夢不到衰容自
去拋涼天憶得蛟絲裁小卓蛺蝶飛回木絲薄綠繡
笙囊不見人一口紅霞夜深嚼幽蘭泣露新香死畫
圖淺縹松溪水楚絲微覺竹枝高半曲新辭寫綿紙
巴西夜市紅守宮後房點臂斑斑紅堤南渴鴈自飛
久蘆花一夜吹西風曉簾串斷蜻蜓翼羅屏但有空
青色玉灣不釣三千年蓮房暗被蛟龍惜濕銀注鏡

井口平鸞釵映月寒錚錚不知桂樹在何處仙人不
下雙金莖百尺相風插重屋側近嬌紅伴柔綠百勞
不識對月郎湘竹千條爲一束

題城南詩

崔護

去年今日此門中人面桃花相映紅人面不知何處
去桃花依舊笑春風

橫塘

韓偓

秋寒灑背入簾霜鳳脰燈青照洞房蜀紙麝煤添筆
堦越甌犀液發茶香風飄亂點更籌轉拍送繁絃曲
破長散客出門斜月在兩眉愁思向橫塘

恃寵

曹鄴

二月樹色好昭儀正嬌奢恐君愛陽豔斫却園中花
三十六宮女髻鬟各如鴉君王心所憐獨自不見瑕
臺上紅燈盡未肯下金車一笑不得所塵中悉無家
飛燕身更輕何必恃容華

懶卸頭

韓偓

侍女動粧奩故故驚人睡那知本未眠背向偷垂淚
嬾卸鳳凰釵羞入鴛鴦被時復見殘燈和烟墜金穗

結愛

孟郊

心心復心心結愛務在深一度欲離別千回結衣襟

結妾獨守志結君早歸意始知結衣裳不如結心腸
坐結行亦結結盡百年月

兩處

韓偓

樓上淡山橫樓前溝水清憐山又憐水兩處總牽情

半睡

韓偓

擡照仍嫌瘦更衣又怕寒宵分未歸帳半睡待郎看

寄張生

崔鶯鶯

待月西廂下迎風戶半開拂墻花影動疑是故人來

賦崔娘

楊巨源

清潤潘郎玉不如中庭蕙草雪銷初風流才子多春

思腸斷蕭娘一劄書

掘柘詞

溫庭筠

楊柳紫橋綠玫瑰拂地紅繡衫金腰裏花髻玉瓏璁
宿雨香潛潤春流水暗通畫樓初夢斷曉日照湘風

自退

曹鄴

寒女面如花空寂常對影况我不嫁容甘爲瓶墮井

早歸

韓偓

去是黃昏後歸當朧臆時袂衣吟宿醉風動相思

恨詞

白居易

翠黛眉低歛紅珠暗暗銷曾來恨人意不省似今朝

唐詩類苑 卷之三百三十六 卽日

李商隱

小苑試春衣高樓倚暮暉天桃唯是笑舞蝶不空飛
赤嶺久無耗鴻門猶合圍幾家綠錦字含淚坐鴛機

信筆

韓偓

睡髻休頻攏春眉忍更長整釵
梳子重泛酒菊花香
繡疊昏金色羅揉損研光
有時閑弄筆亦畫兩鴛鴦

箇儂

韓偓

甚感殷勤意其如阻礙何
隔簾窺綠齒映柱送橫波
老大逢知少襟懷暗喜多
因傾一樽酒聊以慰蹉跎

徘徊

李商隱

短顧何由遂遲光且莫驚鶯能歌子夜蝶解舞宮城
柳訝眉傷淺桃猜粉太輕年華有情狀吾敢恡生平

出城

李賀

雪下桂花稀啼鳥被彈歸
關水乘驢影秦風帽帶垂
入鄉試萬里無印自堪悲
卿卿忍相問鏡中雙淚姿

碧瓦

李商隱

碧瓦銜珠樹紅輪結綺寮
無雙漢殿鬢第一楚宮腰
霧唾香難盡珠啼冷易銷
歌從雍門學酒是蜀城燒
柳暗將翻巷荷欹正抱橋
鈿轅開道入金管隔隣調
夢到飛魂急書成卽席遙
河流衝柱轉海沫近槎飄

吳市蟾蜍甲巴賓翡翠翹他時未知意重疊贈嬌嬈

惱公

李賀

宋玉愁空斷嬌嬈粉自紅歌聲春草露門掩杏花叢
注口櫻桃小添眉桂葉濃曉奩粧秀靨夜帳減香筒
鈿鏡飛孤鵲江圖畫水蒨陂柁梳碧鳳嫵裊帶金蟲
杜若含清露河蒲聚紫茸月分娥黛破花合靨朱融
髮重疑盤霧腰輕乍倚風密書題豈蕊隱語笑芙蓉
莫鎖茱萸匣休開翡翠籠弄珠驚漢燕燒蜜引胡蜂
醉纈拋紅網單羅挂綠蒙數錢教姹女買藥問巴賓
勻臉安斜鴈移燈想夢熊腸攢非束竹肱急是張弓

晚樹迷新蝶殘蛻憶斷虹古時填渤澥今日鑿崆峒
繡沓褰長幔羅裙結短封心搖如舞鶴骨出似飛龍
井檻淋青漆門鋪綴白銅隈花開兔逕向壁印狐蹤
玳瑁釘簾薄琉璃疊扇烘象牀綠素栢瑤席卷香蔥
細管吟朝幌芳醪落夜楓宜男生楚巷梔子發金墉
龜甲開屏澀鵝毛滲墨濃黃庭畱衛瓘綠樹養韓馮
鷄唱星懸柳鴉啼露滴桐黃娥初出座寵妹始相從
蠟淚垂蘭燼秋蕪掃綺櫳吹笙翻舊引沽酒待新豐
短佩愁填粟長絃怨削菘曲池眠乳鴨小閣睡娃僮
褥縫蓼雙綫鉤緙辮五驄蜀煙飛重錦峽雨濺輕容

拂鏡羞温嶠薰衣避賈克魚生玉藕下人在石蓮中
含水彎娥翠登樓溪馬驥使君居曲陌園令住臨邛
桂火流蘇暖金爐細炷通春遲王子態鶯囀謝娘慵
玉漏三星曙銅街五馬逢犀株防膽怯銀液鎮心忪
跳脫看年命琵琶道吉凶王時應七夕夫位在三宮
無力塗雲母多方帶藥翁符因青鳥送囊用絳紗縫
漢苑尋官柳河橋閣一作閨禁鐘月明中婦覺應笑畫
堂空

六言三首

韓偓

春樓處子傾城金陵狎客多情朝雲暮雨會合羅襪

繡被逢迎華山梧桐相覆蠻江荳蔻連生幽歡不盡
告別秋河悵望平明

一燈前雨落夜三月盡草青時半寒半暖正好花開
花謝相思惆悵空教夢見懊惱多成酒悲紅袖不乾
誰會揉損絲娟淡眉

此間青草更遠不唯空遶汀洲那裏朝日才出還應
先照西樓憶淚因成恨淚夢遊長續心遊桃源洞口
來否絳節霓旌久畱

對酒

李白

葡萄酒金叵羅吳姬十五細馬馱青黛畫眉紅錦靴

道字不正嬌唱歌玳瑁筵中懷裏醉芙蓉帳底奈君何

三五七言

李白

秋風清秋月明落葉聚還散寒鴉栖復驚相思相見知何日此時此夜難為情

玉合

雜言

韓偓

羅囊繡兩鳳凰玉合雕雙鷓鴣中有蘭膏漬紅苧每回拈着長思憶長思憶經幾春人悵望香氛氤開緘不見新書跡帶粉猶殘舊指痕

金陵

雜言

韓偓

風雨蕭蕭石頭城下木蘭橈烟月迢迢金陵渡口來去潮自古風流皆暗銷才鬼妖魂誰與招綵牋麗句徒已矣羅襪金蓮何寂寥

三憶

韓偓

憶眠時春夢困騰騰展轉不能起玉釵垂枕稜
憶行時背手移金雀歛笑慢回頭步轉欄干角
憶去時向月遲遲行強語戲同伴圖郎聞笑聲

美人梳頭

張碧

玉堂花院小枝紅綠牕一片春光曉玉容驚覺濃睡醒圓蟾挂出粧臺表金盤解下叢髮碎二尺巫雲縮

朝翠皓指高低寸黛愁水精梳滑參差隊須臾攏掠
蟬鬢生玉釵冷透冬冰明芙蓉折向新開臉秋泉慢
轉眸波橫鸚鵡偷來話心曲屏風半倚遙山綠

嬋娟篇

孟郊

花嬋娟泛春泉竹嬋娟籠曉烟妓嬋娟不長妍月嬋
娟真可憐夜半嫦娥朝太一人間本自無靈匹漢宮
承寵不多時飛燕婕妤相妬嫉

擬百勞歌

司空曙

朱絲細絃金點雜雙帶芙蓉共開合誰家稚女着羅
裳紅粉青眉嬌暮粧木難作牀牙作席雲母屏風光
照壁玉顏年幾新上頭回身歛笑多自羞紅銷月落
不復見可惜當時誰拂面

休洗紅

李賀

休洗紅洗多紅色淺卿卿騁少年昨日殷橋見封侯
早歸來莫作弦上箭

密意

韓偓

呵花貼鬢粘寒髮凝酥光透猩猩血經過洛水幾多
人唯有陳王見羅襪

踏青

韓偓

踏青會散欲歸時金車久立頻催上收裙整髻故遲

留兩點深心各惆悵

獨眠吟二首

白居易

夜長無睡起階前
寥落星河欲曙天
十五年來明月夜
何曾一夜不孤眠

獨眠客夜夜可憐
長寂寂就中今夜
最愁人涼月清風
滿牀席

忍笑

韓偓

宮樣衣裳淺畫眉
曉來梳洗更相宜
水精鸚鵡釵頭顫
舉袂佯羞忍笑時

再青春

韓偓

兩重門裏玉堂前
寒食花枝月午天
想得那人垂手立
嬌羞不肯上鞦韆

中庭

韓偓

夜短睡遲慵早起
日高方始出紗牕
中庭自摘青梅子
先向釵頭戴一雙

新上頭

韓偓

學梳鬆鬢試新裙
消息佳期在此春
爲要好多心轉惑
遍將宜稱問傍人

聯綴體

韓偓

院宇明秋日日長
社前一鴈別遼陽
隴頭針線年年

唐詩類苑 卷之三百三十九
事不喜寒砧搗斷腸

病憶

韓偓

信知尤物必牽情一顧難酬覺命輕
曾把禪機銷此病破除才盡又重生

遣懷

杜牧

落魄江南載酒行楚腰腸斷掌中輕
十年一覺揚州夢占得青樓薄倖名

蹤跡

韓偓

東烏西兔似車輪劫火桑田不復論
唯有風光與蹤跡思量長是暗銷魂

日射

李商隱

日射紗牕風撼扉香羅掩手春事違
回廊四合掩寂寞碧鸚鵡對紅薔薇

新秋

韓偓

一夜清風動扇愁背時容色入新秋
桃花臉裏汪汪淚忍到更深枕上流

東南

李商隱

東南一望日中烏欲逐羲和去得無
且向秦樓棠樹下每朝先覓照羅敷

遶廊

韓偓

唐詩類苑 卷之三百五十一
濃烟隔簾香漏泄斜燈映竹光參差遶廊倚桂堪一作
更一惆悵微雨輕寒花落時

霜月

李商隱

初聞征鴈已無蟬百尺樓南水接天青女素娥俱耐
冷月中霜裏鬪嬋娟

定子

李商隱

檀槽一抹廣陵春定子初開睡臉新却笑喫隋煬
帝破家亡國爲何人

爲有

李商隱

爲有雲屏無限嬌鳳城寒盡怕春宵無端嫁得金龜

壻辜負香衾事早朝

惆悵

韓偓

身情常在暗相隨生魄隨君君豈知被頭不暖空沾
淚釵股欲分猶半疑朗月清風難愜意詞人絕色多
傷離何如飲酒連千醉席地幕天無所知

咏浴

韓偓

再整魚犀攏翠簪解衣先覺冷森森教移蘭燭頻羞
影自試香湯更怕深初似洗花難抑按終憂沃雪不
勝任豈知侍女簾幃外賸取君王幾餅金

有憶

韓偓

唐詩類考 卷之二十一
晝漏迢迢夜漏移傾城消息杳無期愁腸泥酒人千
里淚眼倚樓天四垂自笑計狂多獨語誰憐夢好轉
相思何時斗帳濃香裏分付春風與玉兒

賦得

劉長卿

鶯啼燕語報新年馬色龍飛路幾千家住層城臨漢
苑心隨明月到胡天機中錦字論長恨樓上花枝笑
獨眠爲問元戎寶車騎何時返旆勒燕然

倚醉

韓偓

倚醉無端尋舊約却令惆悵轉難勝靜中樓閣深春
雨遠處簾籠半夜燈抱柱立時風細細遶廊行處思

騰騰分明牕下聞裁剪敲遍欄干喚不應

多情

韓偓

天遣多情不自持多情兼與病相宜蜂偷野蜜初嘗
處鶯啄含桃欲咽時酒蕩襟懷微駮駮春牽情緒更
融怡水香剩貯金盆裏瓊樹長須浸一枝

擁鼻

韓偓

擁鼻悲吟一向愁寒更轉盡未回頭綠屏無睡秋分
簾紅葉傷時月午樓却要因循添逸興若爲趨競愴
離憂殷勤憑仗官渠水爲到西溪動釣舟

意緒

韓偓

絕代佳人何寂寞梨花未發梅花落東風吹雨入西
園銀線千條度虛閣臉粉難勻蜀酒濃口脂易印吳
綾薄嬌嬈意緒不勝羞願倚郎肩永相着

晝寢

韓偓

碧桐陰靜隔簾櫳扇拂金鵝玉簟烘撲粉更添香體
滑解衣從見下裳紅煩襟乍觸冰臺冷倦枕徐歌寶
髻鬆何必苦勞魂與夢王昌只在此墻東

妬媒

韓偓

洞房深閉不曾開橫臥烏龍作妬媒好鳥豈須兼比
翼翼花何必更重臺難留旋逐驚颿去暫反如隨急

電來多爲過防成後悔偶因翻語得深猜已嫌是臘
春宵短最恨鳴珂曉鼓催應笑楚襄仙分薄日中長
是獨徘徊

賦詩

辛弘智

君爲河邊草逢春心剩生妾如臺上鏡得照始分明

寄非烟

武氏妾

趙象

一覩傾城貌塵心只自猜不隨蕭史去擬學阿蘭來

答趙象

非烟

綠慘嬌娥不自持只緣幽恨在新詩郎心應似琴心
怨脉脉春情更泥誰

又贈

趙象

珍重佳人惠好音
綵牋花翰兩情深
薄如蟬翼誰供
眼密似蠅頭未寫心
疑是落花還碧洞
又思輕雨滿
幽襟百回消息千回
夢裁作長謠寄綠琴

答趙象獨坐

非烟

無力嚴粧倚繡櫳
聊題蟬錦思
窮近來贏得傷春
病柳弱花欹怯晚風

又答

趙象

擲履仙鳧起捲衣
蝴蝶飄羞中含薄
怒嚙裏帶餘嬌
醒後猶攘腕歸時更折腰
狂夫自纓絕眉勢倩誰描

寄歐陽詹

太原妓

自從別後減容光
半是思郎半恨郎
欲識舊來雲髻
樣為奴開取纓金箱

唐詩類苑卷第一百四十四

明雲間張之象玄超甫纂輯

雲間姜雲龍神超甫編次

雲間王徹叔朗甫補訂

梁谿曹仁孫伯安甫校正

人部

幽怨

怨詩行二首

薛竒童

古今樂錄曰怨詩行歌東阿王明月照高樓一篇
王僧虔伎錄曰荀錄所載古為君一篇今不傳琴

唐言類考 卷之三百四十一
操曰卞和得玉璞獻楚懷王王使樂正子治之曰
非玉別其右足平王立復獻之又以爲欺別其左
足平王死子立復獻抱玉而哭繼之以血荆山爲
崩王使剖之果有寶封和爲陵陽侯辭不受而作
怨歌班婕妤怨詩行序曰漢成帝班婕妤失寵求
供養太后於長信宮作怨詩自傷託辭於紈扇云
樂府解題曰古詞云爲君旣不易爲臣良獨難言
周公推心輔政二叔流言致有雷雨拔木之變梁
簡文十五頗有餘自言姝豔以纔見毀又曰持此
傾城貌翻爲不肖軀與古文意同而體異若傅休

奕怨歌行云昭昭朝時日皎皎最明月蓋傷十五
入君門一別終華髮不及偕老猶望死而同穴也
日晚梧桐落微寒入禁垣月懸三雀觀霜度萬秋門
豔舞矜新寵愁容泣舊恩不堪深殿裏簾外欲黃昏

二

禁苑春風起流鶯遶合歡玉牕通日氣珠箔卷輕寒
楊葉垂陰砌梨花入井欄君王好長袖新作舞衣寬

怨詩

劉元濟

玉關芳信斷蘭閨錦字新愁來好自抑念切已含嚔
虛牖風驚夢空牀月厭人佳期儻可促勿度柳園春

唐詩類苑 卷之二十四
怨歌行

李白

十五入漢宮花顏笑春紅君王選玉色侍寢金屏中
薦枕嬌夕月卷衣戀春風寧知趙飛燕奪寵恨無窮
沈憂能傷人綠鬢成霜蓬一朝不得意世事徒爲空
鸚鵡換美酒舞衣罷雕籠寒苦不忍言爲君奏絲桐
腸斷絃亦絕悲心夜冲冲

怨歌行

吳少微

城南有怨婦含怨倚蘭叢自謂二八時歌舞入漢宮
皇恩弄幸玉堂中綠陌黃花催夜酒錦衣羅袂逐春
風建章西宮煥若神燕趙美女二千人君王厭德不

忘新成群豔冶紛來陳是時別君不再見三十三春
長信殿長信重門晝掩關清房曉帳幽且閑綺牕蟲
網氛塵色文軒鶯對桃李顏天王貴宮一貯老浩然
淚隕今來還自隣春色轉晚暮試逐佳遊芳草路小
腰麗女奪人竒金鞍少年曾不顧歸來誰爲夫請謝
西家婦莫辭先醉解羅襦

怨歌

薛維翰

百尺珠樓臨狹斜新粧能唱美人車皆言賤妾紅顏
好要自狂夫不憶家

怨歌行

虞世南

唐言類苑 卷之三百四十一
紫殿秋風冷雕甍落日沈裁紉悽斷曲織素引離心
掖庭羞改畫長門不惜金寵移恩稍薄情疎恨轉深
香銷翠羽帳絃斷鳳凰琴鏡前紅粉歇堦上綠苔侵
誰言掩歌扇翻作白頭吟

怨辭二首

崔國輔

妾有羅衣裳秦王在時作爲舞春風多秋來不堪著

二

樓前桃李疎池上芙蓉落織錦猶未成蟲聲入羅幙

怨詞

白居易

奪寵心那慣尋思倚殿門不知移舊愛何處作新恩

怨情

李白

美人卷珠簾深坐顰蛾眉但見泪痕濕不知心恨誰

怨情

李白

新人如花雖可寵故人似玉由來重花性飄揚不自
持玉心皎潔終不移故人昔新今尚故還見新人有
故時請看陳后黃金屋寂寂珠簾生網絲

惆悵詞二首

王之渙

晨肇重來路已迷碧桃花謝武陵溪山日斷無尋
處流水潺湲日漸西

夢裏分明入漢宮覺來燈背錦屏空紫臺月落關山

唐詩類苑 卷之三百四十一
四
曉腸斷君恩信盡工

春怨

金昌緒

打却黃鶯兒莫教枝上啼幾迴驚妾夢不得到遼西

春怨

崔巨

夜盡夢初驚紗牕早霧明曉粧脂粉薄春服綺羅輕
妾有今朝恨君無舊日情愁來理絃管皆是斷腸聲

春怨

孟浩然

佳人能畫眉粧罷出簾幃照水空自愛折花將遺誰
春情多豔逸春意倍相思愁心樹楊柳一種亂如絲

陽春怨

許景先

紅樹曉鶯啼春風暖翠閨雕籠熏繡被珠履踏金堤
芍藥花如吐菖蒲葉正齊稿砧當此日行役向遼西

春怨

鄭愔

春朝物候妍愁婦鏡臺前風吹數蝶亂露洗百花鮮
試出褰羅幌還來著錦筵曲中愁夜夜樓上別年年
不及隨蕭史高飛向紫煙

春怨

李白

白馬金羈遼海東羅帷繡被卧春風落月低軒窺燭
盡飛花入戶笑牀空

春怨

劉方平

唐詩類苑 卷之二十四 五
紗牕落日漸黃昏金屋無人見淚痕寂寞空庭春又
晚梨花滿地不開門

春怨

劉兼

繡林紅岸落花鈿故去新來感自然絕塞杪春悲漢
月長林深夜泣湘絃錦書鴈斷應難寄菱鏡鸞孤貌
可憐獨倚畫屏人不會夢魂纔別戍樓邊

春女怨

薛惟翰

白玉堂前一樹梅今朝忽見數花開兒家門戶尋常
閉春色因何入得來

春女怨

朱絳

獨坐紗牕刺繡遲紫荊枝上轉黃鸝欲知無限傷春
意併在停鍼不語時

秋怨

皇甫冉

長信多秋氣昭陽借月華那堪閉永巷聞道選良家

感秋別怨

盧仝

霜秋自斷魂楚調怨離分魄散瑤臺月心隨巫峽雲
蛾眉誰共畫鳳曲不同聞莫似湘妃淚斑斑點翠裙

清夜怨

李商隱

含淚坐春宵聞君欲度遼綠池荷葉嫩紅砌杏花嬌
曙月當牕滿征雲出塞遙畫樓終日閉清管爲誰調

唐詩類苑 卷之二十四 玉階怨

李白

玉階生白露夜久侵羅襪却下水晶簾玲瓏望秋月

綠墀怨

李元紘

征馬噪金珂嫋姚向北河綠苔行跡少紅粉淚痕多

寶屋粘花絮銀箏覆網羅別君如昨日青海鴈頻過

相思怨

李元紘

望月思氛氳朱衾嬾更熏春生翡翠帳花點石榴裙

燕語時驚妾鶯啼轉憶君交河一萬里仍隔數重雲

綵書怨

上官昭容

葉下洞庭初思君萬里餘露濃香被冷月落錦屏虛

欲奏江南曲貪封薊北書書中無別意惟悵久離居

孤寢怨

崔珪

征戍動經年含情拂玳筵花飛織錦處月落擣衣邊

燈暗愁孤坐牀空怨獨眠自居遼海去玉匣閉春絃

開緘怨

朱琳

夫婿邊庭久幽閨恨幾重玉琴知別日金鏡識愁容

嬾寄雲中服慵開海外封年年得衣慣且試莫裁縫

鳳樓怨

顏舒

佳人名莫愁珠箔上花鈎清鏡鴛鴦匣新粧翡翠樓

擣衣明月夜吹管白雲秋唯恨金吾子年年向隴頭

蛾眉怨

王翰

君不見宜春苑中九華殿飛閣連連直如髮白日全
 含朱鳥牕流雲半入蒼龍闕宮中綵女夜無事學鳳
 吹簫弄清越珠簾北卷待涼風繡戶南開向明月忽
 聞天子憶蛾眉寶鳳銜花撲兩螭傳聲走馬開金屋
 夾路鳴環上玉墀長樂彤庭宴華寢三千美人曳光
 錦燈前含笑更羅衣帳裏承恩薦瑤枕不意君心半
 路迴求仙別作望仙臺蒼琅禁闥遙相憶紫翠巖房
 晝不開欲向人間種桃實先從海底覓蓬萊可求不
 可上孤舟縹緲知何往黃金作盤銅作莖晴天白露

掌中擎王母媯然感君意雲車羽旆欲相迎飛廉觀
 前空怨慕少君何事須相誤一朝埋沒茂陵田賤妾
 蛾眉不重顧宮車晚出向南山仙衛逶迤去不還朝
 晡泣對麒麟樹樹下蒼苔日漸斑人生百年夜將半
 對酒長歌莫長嘆情知白日不可思一死一生何足
 算

後庭怨

王諲

君不見紅閨少女端正時天天桃李仙容姿幸得君
 王憐巧笑披香殿裏薦蛾眉蛾眉雙雙人共進常恐
 妾身從此擯甄妃為妬出層宮班女因猜下長信長

信宮門閉不開昭陽歌吹風送來夢中魂魄猶言是
覺後精神尚未迴念君嬌愛無終始使妾長啼後庭
裏獨立每看斜日盡孤眠直至殘燈死秋日聞蟲翡
翠簾春晴照面鴛鴦水紅顏舊來花不勝白髮如今
雪相似傳聞紈扇恩未歇預想蛾眉上初月如君貴
僞不貴真還同棄妾逐新人借問南山松葉意何如
砌北槿花新

邯鄲宮人怨

崔顥

邯鄲陌上三月春暮行逢見一婦人自言鄉里本燕
趙少小隨家西入秦母兄憐愛無儔侶五歲名爲阿

嬌女七歲丰茸好顏色八歲黠惠能言語十三兄弟
教詩書十五青樓學歌舞我家青樓臨道傍紗牕綺
幔暗聞香朝暮笙歌駐君馬春日粧梳妾斷腸不用
城南使君壻本求三十侍中郎何知漢帝好容色玉
輦攜登歸建章建章宮殿不知數萬戶千門深且長
百堵塗椒接青瑣九華閣道連洞房水晶簾箔雲母
扇琉璃牕牖玳瑁牀歲歲年年奉歡宴嬌貴榮華誰
不羨恩情莫比陳皇后寵愛全勝趙飛燕瑤房侍寢
出莫知金屋更衣人不見誰言一朝復一日君王棄
世市朝變宮車出葬茂陵田賤妾獨留長信殿一朝

唐詩類苑 卷之二十四
太子升至尊宮中人事如翻掌同時侍女見讒毀後
來新人莫敢言兄弟印綬皆被奪昔年賞賜不復存
一旦放歸舊鄉里乘車垂淚還入門父母愍我曾富
貴嫁與西舍金王孫念此翻覆復何道百年盛衰誰
能保憶昨尚如春日花悲今已作秋時草少年去去
莫停鞭人生萬事由上天非我今日獨如此古今歇
薄皆共然

吳宮怨

衛 萬

君不見吳王宮閣臨江起不卷珠簾見江水曉氣晴
來雙闕間潮聲夜落千門裏句踐城中非舊春姑蘇

臺下起黃塵祗今唯有西江月曾照吳王宮裏人

吳宮怨

張 籍

吳宮四面秋江水江清露白芙蓉死吳王醉後欲更
衣座上美人嬌不起宮中千門復萬戶君恩反覆誰
能數君心與妾既不同徒向君前作歌舞茱萸滿宮
紅實垂秋風嫋嫋生繁枝姑蘇臺上夕燕罷他人侍
寢還獨歸白日在天光在地君今那得長相棄

古宮怨

長孫佐輔

牕前好樹名玫瑰去年花落今年開無情春色尚識
反君心忽斷何時來憶昔粧成候仙仗宮璫玲瓏日

新上拊心却笑西子顰掩鼻誰憂鄭姬謗草染文章
衣下履花粘甲乙牀前帳三千玉貌休自誇十二金
釵獨相向盛衰傾奪欲何如嬌愛翻悲逐佞諛重遠
豈能慙沼鵠棄前方見泣船魚看籠不記熏龍腦詠
扇空曾禿鼠鬚始喜類蘿新託栢終傷如薺却甘荼
院深獨開還獨閉鸚鵡驚飛苔覆地滿箱舊賜前日
衣滴枕新垂夜來淚恨多開鏡照還悲綠髻青娥尚
未衰莫道新縑長絕比猶逢故劍會相追

西宮春怨

王昌齡

西宮夜靜百花香欲卷珠簾春恨長斜抱雲和深見

月朧朧樹色隱昭陽

青樓怨

王昌齡

香幃風動花入樓高調鳴箏緩夜愁腸斷關山不解
說依依殘月下簾鉤

古宮怨

王建

亂烏啞啞飛復啼城頭晨夕宮中棲吳王別殿繞江
水後宮不開美人死

長門怨

徐賢妃

漢武帝故事曰武帝爲膠東王時長公主嫖有女
欲與王婚景帝未許後長主還宮膠東王數歲長

唐言類苑 卷之二十四
主抱置膝上問曰兒欲得婦否長主指左右長御
百餘人皆云不用指其女問曰阿嬌好否笑對曰
好若得阿嬌作婦當作金屋貯之長主乃苦要帝
遂成婚焉漢書曰孝武陳皇后長公主嫖女也擅
寵嬌貴十餘年而無子聞衛子夫得幸幾死者數
焉元光五年廢居長門宮樂府解題曰長門怨者
爲陳皇后作也后退居長門宮愁悶悲思聞司馬
相如工文章奉黃金百斤令爲解愁之辭相如爲
作長門賦帝見而傷之復得親幸後人因其賦而
爲長門怨也

舊愛栢梁臺新寵昭陽殿守分辭方輦含情泣團扇
一朝歌舞榮夙昔詩書賤積恩誠已矣覆水難重薦

長門怨

吳少微

月出映層城孤圓上太清君王春愛歇枕席涼風生
怨咽不能寢踟躕步前楹空階白露色百草寒蟲鳴
念昔金房裏猶嫌玉座輕如何嬌所悞長夜泣恩情

長門怨

袁暉

早知君愛歇本自無縈妬誰使恩情深今來反相誤
愁眠羅帳曉泣坐金闈暮獨有夢中魂猶言意如故

長門怨

齊幹

唐詩類苑 卷之二十四
三
煢煢孤思逼寂寂長門夕妾妬亦非深君恩那不借
攜琴就玉階調悲聲未諧將心寄明月流影入君懷

長門怨

盧綸

空空古廊殿寒月落斜暉卧聽未央曲滿箱歌舞衣

長門怨

沈佺期

月皎風泠泠長門次掖庭玉階聞墜葉羅幌見飛螢
清露凝珠綴流塵下翠屏妾心君未察愁嘆劇繁星

長門怨

崔顥

君王寵初歇棄妾長門宮紫殿青苔滿高樓明月空
夜愁生枕席春意罷簾櫳泣盡無人問容華落鏡中

長門怨

賈至

獨坐思千里春庭曉景長鶯喧翡翠幙柳暗鬱金堂
舞蝶縈愁緒繁花對靚粧深情託瑤瑟絃斷不成章

長門怨

岑參

君王嫌妾妬閉妾向長門舞袖垂新寵愁眉結舊恩
綠錢生履迹紅粉濕啼痕羞被桃花笑看春獨不言

長門怨

李華

弱體鴛鴦薦啼粧翡翠衾鴟鳴秋殿曉人靜禁門深
每憶椒房寵那堪永巷陰日驚羅帶緩非復舊來心

長門怨

劉長卿

何事長門閉珠簾只自垂月移深殿早春向後宮遲
蕙草生閑地梨花發舊枝芳菲自恩幸看著被風吹

長門怨二首

李白

天回北斗挂西樓金屋無人螢火流月光欲到長門
殿別作深宮一段愁

桂殿長愁不記春黃金四屋起秋塵夜懸明鏡青天
上獨照長門宮裏人

長門怨

僧皎然

春風日日閉長門搖蕩春心自夢魂若遣花開只關
妾不如桃李正無言

長門怨

劉阜

宮殿沈沈月色分昭陽更漏不堪聞珊瑚枕上千行
淚不是思君是恨君

長門怨

裴交泰

自閉長門經幾秋羅衣濕盡淚空流一種蛾眉明月
夜南宮歌管北宮愁

長門怨

劉言史

獨坐爐邊結夜愁暫時思去亦難收手持金筋垂紅
淚亂撥寒灰不舉頭

長門怨二首

女郎劉媛

唐詩類苑 卷之二十四
雨滴梧桐秋夜長愁心和雨到昭陽淚痕不學君恩
斷拭却千行更萬行
學盡蛾眉獨出群當時人道便承恩經年不見君王
面花落黃昏空掩門

長門怨

李端

金壺漏盡禁門開飛燕昭陽侍寢迴隨分獨眠秋殿
裏遙聞語笑自天來

長信怨

王諲

飛燕倚身輕爭人巧笑名生君棄妾意增妾怨君情
日落昭陽壁秋來長信城寥寥金殿裏歌吹夜無聲

長信宮

李白

月皎昭陽殿霜清長信宮天行乘玉輦飛燕與君同
更有歡娛處承恩樂未窮誰憐團扇妾獨坐怨秋風

長信秋詞五首

王昌齡

金井梧桐秋葉黃珠簾不捲夜來霜熏籠玉枕無顏
色卧聽南宮清漏長

高殿秋砧響夜闌霜深猶憶御衣寒銀燈青瑣裁縫
歇還向金城明主看

奉帚平明金殿開且將團扇共徘徊玉顏不及寒
色猶帶昭陽日影來

唐言類苑 卷之二十四
真成薄命久尋思夢見君王覺後疑火照西宮知夜
飲分明複道奉恩時

長信宮中秋月明昭陽殿下擣衣聲白露堂中細草
迹紅羅帳裏不勝情

長信怨

錢起

長信螢來一葉秋蛾眉淚盡九重幽鳩鵲觀前明月
度芙蓉闕下絳河流鴛衾久別難爲夢鳳管遙聞更
起愁誰分朝陽夜歌舞君王玉輦正淹留

西宮秋怨

王昌齡

芙蓉不及美人粧水殿風來珠翠香却恨含啼掩秋

扇空懸明月待君王

離宮怨

張籍

高堂別館連湘渚長向春光開萬戶荆王去去不復
來宮中美人自歌舞

阿嬌怨

劉禹錫

望見葳蕤舉翠華試開金屋掃庭花須臾宮女傳來
信言幸平陽公主家

閨怨

薛維翰

美人怨何深含情倚金閣不笑復不語珠淚紛紛落

閨怨

沈如筠

隴底嘆長別流襟一動君得言幽咽所更作死生分

閨怨詞三首

白居易

朝憎鶯百轉夜妬燕雙棲不慣經春別唯知到曉啼

二

珠箔籠寒月紗牕背曉燈夜來巾上淚一半是春冰

三

關山征戍遠閨閣別離難苦戰應憔悴寒衣不要寬

春閨怨三首

張仲素

雪盡萱抽葉風輕水變苔玉關書信絕又見發庭梅

二

裊裊邊城柳青青陌上桑提籠行採葉昨夜夢漁陽

三

桂魄初生秋露微輕羅已薄未更衣銀箏夜久殷勤
弄心怯空房不忍歸

閨怨

王昌齡

閨中少婦不曾愁春日凝粧上翠樓忽見陌頭楊柳
色悔教夫婿覓封侯

閨怨

張紘

去年離別鴈初歸今夜裁縫螢已飛征客近來音信
斷不知何處寄邊衣

寒閨怨

白居易

寒月沈沈洞房靜
珍珠簾外梧桐影
秋霜欲下手先
知燈底裁縫剪刀冷

閨怨

魚玄機

靡蕪盈手泣斜暉
聞道隣家夫婿歸
別日南鴻纔北
去今朝北鴈又南飛
春來秋去相思在
秋去春來信
息稀
宿閉朱門人不到
砧聲何事透羅幃

閨怨

黃滔

寸心杳與馬蹄隨
如蛻形容在錦帷
江上月明船發
後花間日暮信迴時
五陵夜作酬恩計
四塞秋為破

虜期待到乘輶入門處
淚珠流盡玉顏衰

閨怨

黃滔

妾家五嶺南
君戍三城北
鴈來雖有書
衡陽越不得
別久情易料
豈在窺翰墨
塞上無煙花
寧思妾顏色

班婕妤二首

徐彥伯

一曰婕妤怨
漢書曰孝成班婕妤初入宮為少娥
俄而大幸為婕妤居增成舍自鴻嘉後帝稍隆內
寵婕妤進侍者李平平得幸為婕妤賜姓衛所謂
衛婕妤也其後趙飛燕姊弟亦從徵賦與班婕妤
失寵稀復進見趙氏姊弟嬌妬婕妤恐久見危求

唐言類苑 卷之二十四
供養太后長信宮帝許焉樂府解題曰婕妤怨者
爲漢成帝班婕妤作也婕妤徐令彪之姑況之女
美而能文初爲帝所寵愛後幸趙飛燕姊弟冠於
後宮自知見薄乃退居東宮作賦及紈扇詩以自
傷悼後人傷之而爲婕妤怨也

君恩忽斷絕妾思終未央巾櫛不可見枕席空餘香
牕暗網羅白階秋苔蘚黃應門寂已閉流涕向昭陽

二

更有留情處承恩樂未窮誰憐團扇妾獨坐怨秋風

代班姬

曹鄴

寵極多妬容乘車上金階歛然趙飛燕不語到日西
手把菖蒲花君王喚不來常嫌鬢驪重乞人白玉釵
君心無定波咫尺流不回後宮門不掩每夜黃鳥啼
買得千金賦花顏已如灰

班婕妤三首

王維

玉牕螢影度金殿人聲絕秋夜守羅帷孤燈耿不滅

二

宮殿生秋草君王恩幸疎那堪聞鳳吹門外度金輿

三

怪來粧閣閉朝下不相迎總向春園裏花間語笑聲

婕妤怨

皇甫冉

花枝出建章鳳管發昭陽借問承恩者雙蛾幾許長

婕妤怨

崔湜

不分君恩斷新粧視鏡中容華向春日嬌愛似秋風
枕席臨燈曉屏幃向日空年年後庭樹榮落在深宮

班婕妤

嚴武

賤妾如桃李君王若歲時秋風一已勁搖落不勝悲
寂寂蒼苔滿沈沈綠草滋繁華非此日指輦競何辭

婕妤怨

皇甫冉

由來詠團扇今已值秋風事逐時皆往恩無日再中

早鴻聞上苑寒露下深宮顏色年年異相如賦豈工

婕妤怨

李咸用

莫恃芙蓉開滿面更有身輕似飛燕不得團圓長近
君珪月鉞時泣秋扇

明妃曲四首

儲光義

一曰王昭君唐書樂志曰明君漢曲也元帝時匈奴
單于入朝詔以王嬙配之即昭君也及將去入
辭光彩射人悚動左右天子悔焉漢人憐其遠嫁
為作此歌晉石崇之妓綠珠善舞以此曲教之而
自製新歌按此本中朝舊曲唐為吳聲蓋吳人傳

授訛變使然也西京雜記曰元帝後宮既多不得常見乃使畫工圖其形按圖召幸宮人皆賂畫工多者十萬少者亦不減五萬昭君自恃容貌獨不肯與工人乃醜圖之遂不得見後匈奴入朝求美入爲閼氏帝按圖以昭君行及去召見貌爲後宮第一善應對舉止閑雅帝悔之而名籍已定方重信於外國故不復更人乃窮按其事畫工有杜陵毛延壽爲人形醜好老少必得其真安陵陳敞新豐劉白龔寬並工爲牛馬飛鳥衆藝人形好醜不逮延壽下杜陽望樊青猶善布色同日棄市籍其

家資皆巨萬京師畫工於是差稀古今樂錄曰明君歌舞者晉太康中季倫所作也王明君本名昭君以觸文帝諱故晉人謂之明君匈奴請婚於漢元帝以後宮良家子明君配焉初武帝以江都王建女細君爲公主嫁烏孫王昆莫令琵琶馬上作樂以慰其道路之思送明君亦然也其新造之曲多哀怨之聲音宋以來明君止以絃隸少許爲上舞而已梁天監中斯宣達爲樂府令與諸樂工以清商兩相閒絃爲明君上舞傳之至今王僧虔伎錄云明君有閒絃及弄注聲又有送聲謝希逸琴

論曰平調明君三十六拍胡笳明君二十六拍清
調明君十三拍閒絃明君九拍蜀調明君十三拍
吳調明君十四拍杜瓊明君二十一拍凡有七曲
琴集曰胡笳明君四弄有上舞下舞上閒絃下閒
絃明君三百餘弄其善者四焉又胡笳明君別五
弄辭漢跨鞍望鄉奔雲入林是也按琴曲有昭君
怨亦與此同樂府解題曰王嬙字昭君琴操載昭
君齊國王穰女端正閑麗未嘗窺門戶穰以其有
異於人求之者皆不與年十七獻之元帝元帝以
地遠不之幸以備後宮積五六年帝每遊後宮常

怨不出後單于遣使朝貢帝宴之盡召後宮昭君
盛飾而至帝問欲以一女賜單于能者往昭君乃
越席請行時單于使在旁驚恨不及昭君至匈奴
單于大悅以爲漢與我厚縱酒作樂遣使報漢白
璧一隻驪馬十匹胡地珍寶之物昭君恨帝始不
見遇乃作怨思之歌單于死子世達立昭君謂之
曰爲胡者妻母爲秦者更娶世達曰欲作胡禮昭
君乃吞藥而死按漢書匈奴傳曰竟寧中呼韓邪
來朝漢歸王昭君號寧胡闕氏呼韓邪死子雕陶
莫臯立爲沒株系若鞮單于欲妻昭君不言飲藥

而死

西行隴上泣胡天南向雲中指渭川
毳幕夜來時宛轉何由得似漢王邊

胡王知妾不勝悲樂府皆傳漢國辭
朝來馬上箜篌引稍似宮中閑夜時

日暮驚沙亂雪飛傍人相勸易羅衣
強來前殿看歌舞共待單于夜獵歸

彩騎雙雙引寶車羌笛兩兩奏胡笳
若爲別得橫橋路莫隱宮中玉樹花

昭君怨

楊凌

漢國明妃去不還馬駝絃管向陰山
匣中縱有菱花鏡羞對單于照舊顏

昭君怨

顧朝陽

莫將鉛粉匣不用鏡花光一去邊城路
何情更畫粧影銷胡地月衣盡漢宮香
妾死非關命都緣怨斷腸

昭君怨

盧照隣

合殿恩中絕交河使漸稀肝腸隨玉輦
形影向金微漢地草應綠胡庭沙正飛
願逐三秋鴈年年一度歸

昭君怨

張文琮

戒途飛萬里迴首望三秦忽見天山雪
還疑上苑春

玉痕垂粉淚羅袂拂胡塵為得胡中曲還悲遠嫁人

昭君怨

董思恭

琵琶馬上彈行路曲中難漢月正南遠燕山直北寒
髻鬟風拂亂眉黛雪沾殘斟酌紅顏改徒勞握鏡看

昭君怨

董初

新年猶尚小那堪遠聘秦裙衫沾馬汗眉黛染胡塵
舉眼無相識路逢皆異人唯有梅將李猶帶故鄉春

昭君怨

李白

漢家秦地月流影照明妃一上玉關道天涯去不歸
漢月還從東海出明妃西嫁無來日燕支長寒雪作

花蛾眉憔悴沒胡沙生乏黃金枉圖畫死留青塚今
人嗟

昭君詞

李端

李陵初送子卿迴漢月明時惆悵來憶著長安舊遊
處千門萬戶玉樓臺

昭君詞

戴叔倫

漢家宮闕夢中歸幾度檀房淚濕衣惆悵不如邊鴈
影秋風猶得向南飛

昭君怨

白居易

明妃風貌最娉婷合在椒房應四星只得當年備宮

掖何曾專夜奉幃屏見疎從道迷圖畫知屈那教配
虜庭自是君恩薄如紙不須一向恨丹青

王昭君三首

東方虬

漢道初全盛朝廷足武臣何須薄命妾辛苦遠和親

二

掩涕辭丹鳳銜悲向白龍單于浪驚喜無復舊時容

三

胡地無花草春來不似春自然衣帶緩非是為腰身

王昭君

崔國輔

漢使南還盡胡中妾獨存紫臺錦望絕秋草不堪論

王昭君三首

郭元振

自嫁單于國長衝哭掖悲容顏日憔悴有甚畫圖時

二

厭踐冰霜域嗟為征塞人思從漢南獵一見漢家塵

三

聞有南河信傳聞殺畫師始知君惠重更遣畫蛾眉

王昭君

李白

昭君拂玉鞍上馬啼紅頰今日漢宮人明朝胡地妾

王昭君

駱賓王

斂容辭豹尾緘怨度龍鱗金鈿明漢月玉筯染胡塵

唐詩類苑 卷之二十四
古鏡菱花暗愁眉柳葉顰唯有清笳曲時聞芳樹春

王昭君

宋之問

非君惜鸞殿非妾妬蛾眉薄命由驕虜無情是畫師
嫁來胡地日不並漢宮時辛苦無聊賴何看馬上辭

王昭君

梁獻

圖畫失天真容蕭坐誤人君恩不可再妾命在和親
淚點關山月衣銷邊塞塵一聞陽鳥至思絕漢宮春

王昭君

上官儀

玉關春色晚金河路幾千琴悲桂條上笛怨柳花前
霧掩臨粧月風驚入鬢蟬裁書待迴使淚盡白雲天

王昭君

李咸用

古帝修文德蠻夷莫敢侵不知桃李貌能轉虎狼心
日暮邊風急程遙積雪深千秋青塚骨畱怨在胡琴

王昭君歌

劉長卿

自矜嬌豔色不顧丹青人那知粉繪能相負却使容
華翻誤身上馬辭君嫁驕虜玉顏對人啼不語北風
鴈急浮雲秋萬里獨見黃河流纖腰不復漢宮寵雙
蛾長向胡天愁琵琶絃中苦調多蕭蕭羌笛聲相和
誰憐一曲傳樂府能使千秋傷綺羅

王昭君二首

白居易

唐詩類苑 卷之二十四
滿面胡沙滿鬢風眉銷殘黛臉銷紅愁苦辛勤憔悴
盡如今却似畫圖中
漢使却迴憑寄語黃金何日贖蛾眉君王若問妾顏
色莫道不如宮裏時

妾薄命

武平一

有女妖且麗徘徊湘水湄水湄蘭杜芳採之將寄誰
瓠犀發皓齒雙蛾顰翠眉紅臉如開蓮素膚若凝脂
綽約多逸態輕盈不自持常矜絕代色復恃傾城姿
子夫前入侍飛燕復當時正悅掌中舞寧哀團扇詩
洛川昔云遇高唐今尚違幽閣禽雀噪閑堦草露滋

流景一何速年華不可追解佩安所贈怨咽空自悲

妾薄命

李白

漢帝寵阿嬌貯之黃金屋咳唾落九天隨風生珠玉
寵極愛還歇妬深情却疎長門一步地不肯暫回車
雨落不上天水覆難再收君情與妾意各自東西流
昔日芙蓉花今成斷根草以色事他人能得幾時好

妾薄命

崔國輔

雖入秦帝宮不上秦帝牀夜夜玉牕裏與他卷羅裳

妾薄命

李端

自從君棄妾憔悴不羞人唯餘壞粉淚未免映衫勻

厚言類考 卷之二十四
妾薄命

盧綸

妾年初二八兩度嫁狂夫薄命今猶在堅貞掃地無

妾薄命

李咸用

妾命何太薄不及宮中水時時對天顏聲聲入君耳

妾薄命

李百藥

團扇秋風起長門夜月明羞聞拊背入恨說舞腰輕

太常應

一作先

已醉劉君恒帶醒橫陳每虛設吉夢竟

何成

賦得妾薄命

杜審言

草綠長門掩苔青永巷幽寵移新愛奪泪落故情留

啼鳥驚殘夢飛花攪獨愁自憐春色罷團扇沒迎秋

妾薄命

劉元淑

自從離別守空閨遙聞征戰起雲梯夜夜愁君遼海

外年年棄妾渭橋西陽春白日照空暖紫燕銜花向

庭滿絲鸞琴裏怨聲多飛鵲鏡前粧梳斷誰家夫婿

不從征應是漁陽別有情莫道紅顏燕地少家家還

似洛陽城且逐新人殊未歸還令秋至夜霜飛北斗

星前橫渡鴈南樓月下擣寒衣夜深聞鴈腸欲絕獨

坐縫衣燈又滅暗啼羅帳空自憐夢度陽關向誰說

每憐容貌宛如神如何薄命不勝人願君朝夕燕山

唐詩類苑 卷之二十四
至好作明年楊柳春

妾薄命

張籍

薄命婦良家子無事從軍去
萬里漢家天子平四夷
護羌都尉裹屍歸念君此行爲死別
對君裁縫泉下衣與君一日爲夫婦
千年萬歲亦相守君愛龍城征戰功
妾願青樓歡樂同人生各各有所欲
詎得將心入君腹

妾薄命

李端

憶妾初嫁君花髮如綠雲
迴燈入綺帳轉面脫羅裙
折步教人學偷香與客熏
容顏南國重名字北方聞

一從失恩意轉覺身憔悴
對鏡不梳頭倚牕空落淚
新人莫恃新秋至會無春
從來閉住長門者必是官
中第一人

妾薄命篇

權德輿

昔住邯鄲年尚少只是嬌羞弄花鳥
青樓碧沙大道邊綠楊日暮風裊裊
嬋娟玉貌二八餘自矜顏色花不如
麗質全勝秦氏女稿砧寧用專城居
歲去年來年漸長青蛾紅粉全堪賞
玉樓珠箔但閑居南北東城詎來往
韶光日日看漸遲標梅旣落行有時
寧知燕趙娉婷子翻嫁幽并遊俠兒
年年結束青絲騎出

唐言類考 卷之三百四十一 二十九
門一去何時至秋月空懸翡翠簾春帷嬾卧鴛鴦被
沙塞經時不寄書深閨愁獨意何如花前拭淚情無
限月下調絃恨有餘離別苦多相見少洞房愁夢何
由曉閒看雙燕淚霏霏靜對空牀魂悄悄鏡裏紅顏
不自禁陌頭香騎動春心爲問佳期早晚是人人總
解有黃金

妾薄命

李端

玉壘城邊爭走馬銅駝市裏共乘舟鳴環動珮恩無
盡掩袖低巾淚不流疇昔將歌邀客醉如今欲舞對
君羞忍懷賤妾平生曲獨上襄陽舊酒樓

古薄命妾

孟郊

不惜十指絃爲君千萬彈常恐新聲至坐使一作故

聲一作曲殘棄置今日悲卽是昨日歡將新變故易持

故爲新難青山有蘼蕪淚葉長不乾空令後代人採

掇幽思攢一作思幽蘭

薄命妾

曹鄴

薄命常測測出門見南北劉郎馬蹄疾何處去不得
淚珠不可收蟲絲不可織知君綠桑下更有新相識

唐詩類苑卷第一百四十終

唐詩類苑卷第一百四十一

明雲間張之象玄超甫纂輯

雲間張所望叔翹甫編次

雲間王徹叔朗甫補訂

梁谿曹仁孫伯安甫校正

人部

幽怨

銅雀臺

王無競

一曰銅雀妓鄴都故事曰魏武帝遺命諸子曰吾死之後葬於鄴之西崗上與西門豹祠相近無藏

金玉珠寶餘香可分諸夫人不命祭吾妾與伎人
皆著銅雀臺臺上施六尺牀下總帳朝脯上酒脯
糗脯之屬每月朝十五輒向帳前作伎汝等時登
臺望吾西陵墓田故陸機弔魏武帝文曰揮清絃
而獨奏薦脯糗而誰嘗悼總帳之冥漠怨西陵之
茫茫登雀臺而羣悲佇美日其何望按銅雀臺在
鄴城建安十五年築其臺最高上有屋一百二十
間連接榱棟侵徹雲漢鑄大銅雀置於樓顛舒翼
奮尾勢若飛動因名爲銅雀臺樂府解題曰後人
悲其意而爲之詠也

北登銅雀上西望青松郭總帳空蒼蒼陵田紛漠漠
平生事已變歌吹宛猶昨長袖拂玉塵遺情結羅幙
妾怨在朝露君恩豈中薄高臺奏曲終曲終淚橫落

銅雀臺

宋之問

昔年分鼎地今日望陵臺一旦雄圖盡千秋遺令開
綺羅君不見歌舞妾空來恩共漳河水東流無重回

銅雀臺

鄭愔

日斜漳浦望風起鄴臺寒玉座平生晚金樽妓吹闌
舞餘依帳泣歌罷向陵看蕭索松風暮愁烟入井欄

銅雀臺

賈至

唐詩類苑 卷之三百四十一
日暮銅臺靜西陵烏雀歸撫絃心斷絕聽管淚霏微
靈几臨朝奠空牀卷夜衣蒼蒼川上月應照妾魂飛

悲銅雀臺

李遠

西陵樹已盡銅雀思偏多雪密疑樓閣花開想綺羅
影銷堂下舞聲斷帳前歌唯有漳河水年年舊綠波

銅雀臺

劉庭琦

銅臺宮觀委灰塵魏主園陵漳水濱卽今西望猶堪
思况復當時歌舞人

銅雀妓

李邕

西陵望何及絃管徒在茲誰言死者傷但令生者悲

丈夫有餘志兒女焉足私擾擾多俗情投迹互相師
直節豈敢激荒淫乃淒其頴水有許由西山有伯夷
頌聲何寥寥唯聞銅雀詩君舉良未易永爲後代嗤

胡笳銅雀妓

劉商

魏主矜蛾眉美人美於玉高臺無晝夜歌舞竟未足
盛色如轉園夕陽落深谷仍令身歿後尚縱平生慾
紅粉淚縱橫調絃向空屋舉頭君不在唯見西陵木
玉輦豈再來嬌髮爲誰綠那堪秋風裏更舞陽春曲
曲罷情不勝闌干向西哭臺邊生野草來去罽羅縠
况復陵寢間雙雙見麋鹿

銅雀妓

朱放

恨唱歌聲咽愁翻舞袖遲西陵日欲暮是妾斷腸時

銅雀妓二首

王勃

金鳳隣銅雀漳河望鄴城君王無處所臺榭若平生
舞筵紛可就歌梁儼未傾西陵松檟冷誰見綺羅情

二

妾本深宮妓層城閉九重君王歡愛盡歌舞爲誰容
錦衾不復縠羅衣誰再縫高堂西北望流涕向青松

銅雀妓

袁暉

君愛本相饒從來似舞腰那堪攀玉座腸斷望陵朝

怨著情無主哀凝曲不調况臨松日暮悲吹坐蕭蕭

銅雀妓

喬知之

金閣惜分香鉛華不重粧空餘歌舞地猶是爲君王
衰絃聲已絕艷曲亦何長共看西陵暮秋烟事白楊

銅雀妓

高適

日暮銅雀迴幽深玉座清蕭森松栢望姿鬱綺羅情
君恩不再重妾舞爲身輕

銅雀妓

歐陽詹

蕭條登古臺回首黃金屋落葉不歸林高陵永爲谷
粧容徒自麗舞態閱誰目惆悵總帷前歌聲苦於哭

追和何謝銅雀妓

李賀

佳人一壺酒秋容滿千里石馬臥新煙憂來何所似
歌聲且潛弄陵樹風自起長裾壓高臺淚眼看花机
強開樽酒向陵看憶得君王舊日歡不覺餘歌悲自
斷非關艷曲轉聲難

銅雀妓

僧皎然

雀臺怨

馬戴

魏宮歌舞地蝶戲鳥還鳴玉座人難到銅臺雨滴平
西陵樹不見漳浦草空生萬恨盡埋此徒懸千載名

息夫人

宋之問

魯莊公十年蔡哀侯娶于陳息侯亦娶焉息媯將
歸過蔡蔡侯曰吾媯也止而見之弗賓息侯怒使
謂楚文王曰伐我吾求救于蔡而伐之秋九月楚
敗蔡於莘十四年蔡侯為莘故繩息媯以語楚子
楚子如息以食入享滅息以息媯歸生堵敖及成
王未言楚子問之對曰吾一婦人而事二夫縱弗
能死其又奚言

可憐楚破息腸斷息夫人乃為泉下骨不作楚王嬪
楚王寵莫盛息君情更親情親怨生別一朝俱殺身

息夫人

王維

唐詩類考 卷之二百四十一
五
寧王憲貴盛寵妓數十人有賣餅之妻織白明媚
王一見屬意因厚遺其夫求之寵愛逾等歲餘因
問曰汝復憶餅師否使見之其妻注視雙淚垂頰
若不勝情時王座客十餘人皆當時文士無不悽
異王命賦詩維先成座客無敢繼者王乃歸餅師
以終其志

莫以今時寵能忘舊日恩看花滿眼淚不共楚王言

長恨歌傳

陳鴻撰

白居易

開元中泰階平四海無事玄宗在位歲久倦于旰
食宵衣政無小大始委于右丞相深居遊宴以聲

色自娛先是元獻皇后武淑妃皆有寵相次即世
宮中雖良家子千數無可悅目者上心忽忽不樂
時每歲十月駕幸華清宮內外命婦媚耀景從浴
日餘波賜以湯沐春風靈液淡蕩其間上心油然
若有顧遇左右前後粉色如土詔高力士潛搜外
宮得弘農楊玄琰女於壽邸既笄矣鬢髮膩理纖
穠中度舉止閑冶如漢武帝李夫人別疏湯泉詔
賜澡瑩既出水體弱力微若不任羅綺光彩煥發
轉動照人上甚悅進見之日奏霓裳羽衣曲以導
之定情之夕授金釵鈿合以固之又命戴步搖垂

唐言類考 卷之三百四十一
金璫明年冊爲貴妃半后服用繇是冶其容敏其
詞婉變萬態以中上意上益嬖焉時省風九州泥
金五岳驪山雪夜上陽春朝與上行同室宴專席
寢專房雖有三夫人九嬪二十七世婦八十一御
妻暨後宮才人樂府妓女使天子無顧眄意自是
六宮無復進幸者非徒殊艷凡態致是蓋才智明
慧善巧便佞先意希旨有不可形容者叔父昆弟
皆列在清貴爵爲通侯姊妹封國夫人富埒王室
車服邸第與大長公主侔而恩澤勢力則又過之
出入禁門不問京師長吏爲側目故當時謠詠有

云生女勿悲酸生男勿喜歡又曰男不封侯女作
妃看女却爲門上楣其人心羨慕如此天寶末兄
國忠盜丞相位愚弄國柄及安祿山引兵向闕以
討楊氏爲辭潼關不守翠華南幸出咸陽道次馬
嵬亭六軍徘徊持戟不進從官郎吏伏上馬前請
誅以謝天下國忠奉鬘纓盤水死於道周左右之
意未快上問之當時敢言者請以貴妃塞天下怨
上知不免而不忍見其死反袂掩面使牽之而去
蒼黃展轉竟就絕於尺組之下旣而玄宗狩成都
肅宗受禪靈武明年大兇歸元大駕還都尊玄宗

爲太上皇就養南宮遷於西內時移事去樂盡悲
來每至春之日冬之夜池蓮夏開宮槐秋落梨園
弟子玉琯發音聞霓裳羽衣一聲則天顏不怡左
右歔歔三載一意其念不衰求之魂夢杳不能得
適有道士自蜀來知上皇心念楊妃如是自言有
李少君之術玄宗大喜命致其神方士乃竭其術
以索之不至又能遊神馭氣出天界沒地府以求
之不見又旁求四虛上下東極大海跨蓬壺見最
高仙山上多樓闕西廂下有洞戶東向闔其門署
曰玉妃太真院方士抽簪扣扉有雙童女出應問

方士造次未及言而雙鬟復入俄有碧衣侍女又
至詰其所從方士因稱唐天子使者且致其命碧
衣云玉妃方寢請少待之于時雲海沈沈洞天日
曉瓊戶重闔悄然無聲方士屏息歛足拱手門下
久之而碧衣延入耳曰玉妃出見一人冠金蓮披
紫綃珮紅玉曳鳳舄左右侍者七八人揖方士問
皇帝安否次問天寶十四年已還事言訖憫然指
碧衣取金釵鈿合各拆其半授使者曰爲謝太上
皇謹獻是物尋舊好也方士受辭與信將行色有
不足玉妃固徵其意復前跪致詞請當時一事不

唐言類考 卷之二十四
爲他人聞者驗於太上皇不然恐鈿合金釵負新
垣平之詐也玉妃茫然退立若有所思徐而言之
曰昔天寶十載侍駕避暑驪山宮秋七月牽牛織
女相見之夕秦人風俗是夜張錦繡陳飲食瓜果
焚香于庭號爲乞巧宮掖間猶尚之夜始半休侍
衛於東西廂獨侍上上凭肩而立因仰天感牛女
事密相誓心願世世爲夫婦言畢執手各嗚咽此
獨君王知之耳因自悲曰由此一念又不得居此
復墮下界且結後緣或爲天或爲人決再相見好
合如舊因言太上皇亦不久人世幸唯自安無自

苦耳使者還奏太上皇皇心震悼日日不豫其年
夏四月南宮晏駕元和元年冬十二月太原白樂
天自校書郎尉于鰲屋鴻與琅邪王質夫家于是
邑暇日相携遊仙遊寺語及此事相與感歎質夫
舉酒于樂天前曰夫希代之事非遇出世之才潤
色之則與時消沒不聞于世樂天深於詩多於情
者也試爲歌之如何樂天因爲長恨歌意者不但
感其事亦欲徵尤物室亂階垂于將來也歌旣成
使鴻傳焉世所不聞者予非開元遺民不得知世
所知者有玄宗本紀在今但傳長恨歌云爾

漢皇重色思傾國御宇多年求不得楊家有女初長
成養在深閨人未識天生麗質難自棄一朝選在君
王側回頭一笑百媚生六宮粉黛無顏色春寒賜浴
華清池溫泉水滑洗凝脂侍兒扶起嬌無力始是新
承恩澤時雲鬢花顏金步搖芙蓉帳暖度春宵春宵
苦短日高起從此君王不早朝承歡侍宴無間暇春
從春遊夜專夜後宮佳麗三千人三千寵愛在一身
金屋粧成嬌侍夜玉樓宴罷醉和春姊妹弟兄皆列
土可憐光彩生門戶遂令天下父母心不重生男重
生女驪宮高處入青雲仙樂風飄處處聞緩歌謾舞

凝絲竹盡日君王看不足漁陽鞞鼓動地來驚破霓
裳羽衣曲九重城闕煙塵生千乘萬騎西南行翠華
搖搖行復止西出都門百餘里六軍不發無奈何宛
轉蛾眉馬前死花鈿委地無人收翠翹金雀玉搔頭
君王掩面救不得回首血淚相和流黃埃散漫風蕭
索雲棧縈紆登劔閣峨眉山下少人行旌旗無光日
色薄蜀江水碧蜀山青聖主朝朝暮暮情行宮見月
傷心色夜雨聞鈴腸斷聲天旋地轉回龍馭到此躊
躇不能去馬嵬坡下泥土中不見玉顏空死處君臣
相顧盡沾衣東望都門信馬歸歸來池苑皆依舊太

唐詩類苑 卷之二十四
十一
液芙蓉未央柳芙蓉如面柳如眉對此如何不淚垂
春風桃李花開夜秋雨梧桐葉落時西宮南苑多秋
草宮葉滿階紅不掃梨園弟子白髮新椒房阿監青
娥老夕殿螢飛思悄然孤燈挑盡未成眠遲遲鐘鼓
初長夜耿耿星河欲曙天鴛鴦瓦冷霜華重翡翠衾
寒誰與共悠悠生死別經年魂魄不曾來入夢臨邛
道士鴻都客能以精誠致魂魄爲感君王展轉思遂
教方士殷勤覓排空馭氣奔如電升天入地求之遍
上窮碧落下黃泉兩處茫茫皆不見忽聞海上有仙
山山在虛無縹緲間樓閣玲瓏五雲起其中綽約多

仙子中有一人字太真雪膚花貌參差是金闕西廂
叩玉肩轉教小玉報雙成聞道漢家天子使九華帳
裏夢魂驚攬衣推枕起徘徊珠箔銀屏迤邐開雲鬢
半偏新睡覺花冠不整下堂來風吹仙袂飄飄舉猶
似霓裳羽衣舞玉容寂寞淚闌干梨花一枝春帶雨
含情凝涕謝君王一別音容兩渺茫昭陽殿裏恩愛
絕蓬萊宮中日月長回頭下望人寰處不見長安見
塵霧唯將舊物表深情鈿合金釵寄將去釵留一股
合一扇釵擘黃金合分鈿但令心似金鈿堅天上人
間會相見臨別殷勤重寄詞詞中有誓兩心知七月

唐言類列 卷之三百四十一
七日長生殿夜半無人私語時在天願作比翼鳥在
地願爲連理枝天長地久有時盡此恨綿綿無絕期

白頭吟

張籍

請君膝上琴彈我白頭吟憶昔君前嬌笑語兩情宛
轉如縈素宮中爲我起高樓更開花池種芳樹春天
百草秋始衰棄我不待白頭時羅襦玉珥色未暗今
朝已道不相宜揚州青銅作明鏡暗中持照不見影
人心回互自無窮眼前好惡那能定君恩已去若再
返菖蒲花開月長滿

卓女怨

盧仝

妾本懷春女春懷不自任迷魂隨鳳客嬌思入琴心
託援交情重當壚酌意深誰家有夫壻作賦得黃金

楚妃怨

張籍

梧桐葉下黃金井橫架轆轤牽素綆美人初起天未
明手拂銀瓶秋水冷

舊宮人

張籍

歌舞梁州女歸時白髮生全家沒蕃地無處問鄉程
宮錦不傳樣御香空記名一身難自說愁逐路人行

舊宮人

項斯

自出先皇玉殿中衣裳不更染深紅宮釵折盡垂空

唐詩類苑 卷之二十四十一
鬢內扇 多減半風桃熟亦曾君手賜酒闌猶候妾
歌終如今還向城邊住御水東流意不通

綠珠篇

喬知之

知之有婢曰碧玉又字窈娘美且善歌知之寵之
爲之不婚後爲武承嗣所奪知之作此篇寄之碧
玉繫於衣帶投井而死承嗣見詩大恨諷酷吏殺
之殘其家

石家金谷重新聲明珠十斛買娉婷昔日可憐君自
許此時可喜得人情君家閨閣未曾難常將歌舞借
人看意氣雄豪非分理嬌矜勢氣橫相干別君去君

終未忍徒勞掩袂傷鉛粉百年離別在高樓一代紅
顏爲君盡

洛神怨

劉滄

子建東歸恨思長飄颻神女步池塘雲鬟高動水宮
影珠翠乍搖沙露光心寄碧沈空婉戀夢殘春色自
悠揚停車綺陌傍楊柳片月青樓落未央

邯鄲才人嫁爲廝養卒婦 李白

妾本崇臺女揚娥入丹闕自倚顏如花寧知有彫歇
一辭玉堦下去若朝雲沒每憶邯鄲城深宮夢秋月
君王不可見惆悵至明發

平虜將軍妻

李白

平虜將軍婦入門二十年君心自不悅妾寵豈能專
出解牀前帳行吟道上篇古人不唾井莫忘昔纏綿
青絲一縷淨雲鬟金剪刀鳴不忍看特問君王寄幽
怨可能從此住人間

楊妃剪髮

王之渙

廬江主人婦

李白

漢末建安中廬江府小吏焦仲卿妻劉氏爲仲卿
母所逐自誓不嫁其家逼之乃投水而死仲卿聞
之亦自縊於庭樹

孔雀東飛何處棲廬江小吏仲卿妻爲客裁縫君自
見城烏獨宿夜空啼

于闐採花

李白

于闐採花人自言花相似明妃一朝西入胡胡中美
女多羞死乃知漢地多名姝胡中無花可方比丹青
能令醜者妍無鹽翻在深宮裏自古妬蛾眉胡沙埋
皓齒

負薪行

杜甫

夔州處女髮半華四十五無夫家更遭喪亂嫁不
售一生抱恨堪咨嗟土風坐男使女立應當門戶女

唐詩類苑 卷之二百五十一
出入十猶八九負薪歸賣薪得錢應供給至老雙鬢
只垂頸野花山葉銀釵並筋力登危集市門死生射
利兼鹽井面粧首飾雜啼痕地褊衣寒困石根若道
巫山女粗醜何得此有昭君村

蓋羅縫二首

秦時明月漢時關萬里征人尚未還但願龍庭神將
在不教胡馬渡陰山
音書杜絕白狼西桃李無顏黃鳥啼寒鴈春深歸去
盡出門腸斷草萋萋

雙帶子

私言切語誰人會海燕雙飛繞畫梁君學秋胡不相
識妾亦無心去採桑

劔南臣

不分君恩斷觀粧視鏡中容華尚春日嬌愛已秋風
枕席臨牕曉屏帷對月空年年後庭樹芳悴在深宮

棄妾篇

喬知之

妾本叢臺右君在鴈門陲悠悠淇水曲采燕入桑枝
不因媒結好本以容相知容謝君應去情移會有離
還君結縷帶歸妾織成詩此物雖輕賤不用使人嗤
下山逢故夫 喬知之

唐詩類苑 卷之三百四十一
妾身本薄命輕棄城南隅庭前厭芍藥山下采薜蘿
春風習紈袖靈露濕羅襦羞將憔悴日提籠逢故夫

去婦詞

李白

古來有棄婦棄婦有歸處今日妾辭君辭君遣何去
本家零落盡慟哭來時路憶昔未嫁君聞君却周旋
綺羅錦繡段有贈黃金千十五許嫁君二十移所天
自從結髮日未幾離君絕山川家家盡歡喜孤妾長
自憐幽閨多怨思盛色無十年相思若循環枕席生
流泉流泉咽不掃獨夢關山道及此見君歸君歸妾
已老物情惡衰賤新寵方妍好掩淚出故房傷心劇

秋草自妾爲君妻君東妾在西羅幃到曉恨玉貌一
生啼自從離別久不覺塵埃厚常嫌玳瑁孤猶羨鴛
鴦偶歲華逐霜霰賤妾何能久寒沼落芙蓉秋風散
楊柳以此憔悴顏空持舊物還餘生欲何寄誰肯相
牽攀君恩旣斷絕相見何年月悔傾連理杯虛作同
心結女蘿附青松貴欲相依投浮萍失綠水教作若
爲流不但君棄妾自歎妾綠業憶昔初嫁君小姑纔
倚牀今日妾辭君小姑如妾長回頭語小姑莫嫁如
兄夫

去婦

孟郊

君心匣中鏡一破不復全妾身藕中絲雖斷猶牽連
安知御輪士今日翻回轅一女事一夫安可再移天
君聽去鶴言哀哀七絲絃

去婦怨

戴叔倫

出戶不敢啼風悲日悽悽心知恩義絕誰忍分明別
下坂車轉轉畏逢鄉里親空持牀前幔却寄家中人
忽辭王吉去爲是秋月死若比今日情煩寃不相似

棄婦

曹鄴

嫁來未曾出此去長別離父母亦有家羞言何以歸
此日年且少事姑常有儀見多自成醜不待顏色衰

何人不識寵所嗟無是非將欲告

意四隣已相疑

棄婦

劉駕

回車在門前欲上心更悲路傍見花發似妾初嫁時
養蠶已成繭織素猶在機新人應笑此何如畫蛾眉
昨日惜紅顏今日畏老遲良媒去不遠此恨今告誰

去婦

王建

新婦去年胼手足衣不暇縫蠶廢簇白頭使我憂家
事還如夜裏燒殘燭當初爲取一作信傍人語豈道如
今日辛辛在時縱嫌織絹遲有絲不上隣家機

征婦怨四首

孟郊

良人昨日去明月又不圓別時各有淚零落青樓前

二

漁陽千里道近如中門限中門踰有時漁陽長在眼

三

生在綠一作羅下不識漁陽道良人自戍來夜夜夢

中到

四

君淚濡羅巾妾淚滿路塵羅巾妾在手今得隨妾身
路塵如得風得上君車輪

征婦怨

張籍

九月匈奴殺邊將漢軍全沒遼水上萬里無人收白骨
家城下招魂葬婦人依倚子與夫同居貧賤心
亦舒夫死戰場子在腹妾身雖存如晝燭

婦人苦

白居易

蟬髮加意梳蛾眉用心掃幾度曉粧成君看不言好
妾身重同穴君意輕偕老惆悵去年來心知未能道
今朝一開口語少意何深願引他時事移君此日心
人言夫婦親義合如一身及至死生際何曾苦樂均
婦人一喪夫終身守孤子有如林中竹忽被風吹折
一折不重生枯死猶抱節男兒若喪婦能不暫傷情

應似門前柳逢春易發榮風吹一枝折還有一枝生
為君委曲言願君再三聽須知婦人苦從此莫相輕

唐詩類苑卷第一百四十一終

唐詩類苑卷第一百四十二

明雲間張之象玄超甫纂輯

雲間張所望叔翹甫編次

雲間王徹叔朗甫補訂

梁谿曹仁孫伯安甫校正

人部

幽怨

杜秋娘詩 并序

杜牧

杜秋金陵女也年十五為李錡妾後錡叛滅籍之
入官有寵於景陵穆宗即位命秋為皇子傅姆皇

子壯封漳王鄭注用事誣丞相欲去已者指王為
根王被罪廢削秋因賜歸故鄉予過金陵感其窮
且老為之賦詩

京江水清滑生女白如脂其間杜秋者不勞朱粉施

老溲即山鑄後庭千雙眉秋持玉竿醉與唱金縷衣

勸君莫惜金縷衣勸君須惜少年時花開堪折直須折莫待無花空折枝李錡長唱此辭溲既白

首叛秋亦紅淚滋吳江落日渡灞岸綠陽垂聯裾見

天子盼眄獨依依椒壁懸錦幕鏡奩蟠蛟螭低鬟認

新寵窈窕復融怡月上白壁門桂影涼參差金階露

新重閑捻紫簫吹晉書盜開涼州張駿塚得紫玉簫莓苔夾城路南

苑鴈初飛紅粉羽林仗獨賜辟邪旗歸來煮豹胎饜

飫不能飴咸池昇日慶銅雀分香悲雷音後車遠事

往落花時燕襟得皇子壯髮綠綉綉畫堂授傅姆天

人親捧持虎睛珠絡祿金盤犀鎮帷長楊射熊羆武

帳弄啞伊漸拋竹馬劇稍出舞鷄奇斬斬整冠珮侍

宴坐瑤池眉宇儼圖畫神秀射朝暉一尺桐偶人江

克知自欺王幽茅土削秋放故鄉歸觚稜拂斗極迴

首尚遲遲四朝三十載似夢復疑非潼關識舊吏吏

髮已如絲却喚吳江渡舟人那得知歸來四隣改茂

苑草菲菲清血灑不盡仰天知問誰寒衣一疋青夜

借隣人機我昨金陵過聞之爲歔歔自古皆一貫變
化安能推夏姬滅兩國逃作巫臣姬西子下姑蘇一
舸逐鴟夷織室魏豹俘作漢太平基悞置代藉中兩
朝尊母儀光武紹高祖本係生唐兒珊瑚破高齊作
婢春黃糜蕭后去揚州突厥爲闕氏女子固不定士
林亦難期射鉤後呼父釣翁王者師無國要孟子有
人毀仲尼秦因逐客令柄歸丞相斯安知魏齊首見
斷箚中屍給喪厯張輩廊廟冠峨危珥貂七葉貴何
妨我虜支蘇武却生返鄧通終死饑主張旣難測翻
覆亦其宜地盡有何物天外復何之指何爲而捉足

何爲而馳耳何爲而聽目何爲而窺己身不自曉此
外何思惟因傾一樽酒題作杜秋詩愁來獨長詠聊
可以自貽

張好好詩

并序

杜牧

牧大和三年佐故吏部沈公江西幕好好年十三
始以善歌來樂籍中後一歲公移鎮宣城復置好
好於宣城籍中後二歲爲沈著作述師以雙鬟納
之後二歲於洛陽東城重覩好好感舊傷懷故題
詩贈之

君爲豫章姝十三纔有餘翠茁鳳生尾丹葉蓮含跗

高閣倚天半章江聯碧虛此地試君唱特使華筵鋪
 主公顧四坐始訝來踟躕吳娃起引贊低徊映長裾
 雙鬟可高下纔過青羅襦盼盼乍垂袖一聲離鳳呼
 繁絃迸關細塞管裂圓盧衆音不能逐裊裊穿雲衢
 主公再三嘆謂言天下殊贈之天馬錦副以水犀梳
 龍沙看秋浪明月遊東湖自此每相見三日已為疎
 玉質隨月滿艷態逐春舒絳脣漸輕巧雲步轉虛徐
 旌旆忽東下笙歌隨舳艫霜凋謝樓樹沙暖句溪蒲
 身外任塵土罇前極歡娛飄然集仙客著作嘗任
集賢校理諷
 賦欺相如聘之碧瑤珮載以紫雲車洞閉水聲遠月

高蟾影孤爾來未幾歲散盡高陽徒洛陽重相見婁
 婁為當壚怪我苦何事少年垂白鬚朋遊今在否落
 拓更能無門館慟哭後水雲秋景初斜日掛衰柳涼
 風生座隅灑盡滿衿淚短歌聊一書

馮小隣

李賀

灣頭見小隣請上琵琶絃破得東風恨今朝直幾錢
 裙垂竹葉帶鬢濕杏花烟玉冷紅絲重齊宮妾駕鞍

蘇小小歌

温庭筠

買蓮莫破券買酒莫解金酒裏春容抱離恨水中蓮
 子懷芳心吳宮女兒腰似束家在錢塘小江曲一自

檀郎逐便風門前春水年年綠

比紅兒詩一百首

羅虬

姓氏看侵尺五天芳名占斷百花鮮馬嵬好笑當時
事虛賺明皇幸蜀川

金谷園中花正繁墜樓從道感深恩齊奴恰是來東
市不為紅兒死更冤

陷却平陽為小憐周師百萬戰長川更教乞與紅兒
貌舉國山河不直錢

一曲都緣張麗華六宮齊唱後庭花若交比並紅兒
貌枉破當時國與家

樂營門外柳如陰中有佳人畫閣深若是五陵公子
見買時應不啻千金

青絲高綰石榴裙腸斷當筵酒半醺置向漢宮圖畫
裏入胡應不數昭君

斜凭欄干醉態新歛眸微盼不勝春當時若遇東昏
主金葉蓮花是此人

匝匝千山與萬山碧桃花下景長閑神仙得似紅兒
貌應免劉郎憶世間

越山重疊越溪斜西子休憐解浣紗得似紅兒今日
貌肯教將去與夫差

唐詩類苑 卷之三百四十五
五
詔下人間選好花月眉雲髻盡名家紅兒若向當時
見繫臂先封第一紗

鋒鏑縱橫不敢看淚垂玉筍正決瀾應緣近似紅兒
貌始得深宮奉五官

金縷濃熏百和香臉紅眉黛入時粧當時若向喬家
見未敢將心在窈娘

通宵甲帳散香塵漢帝精誠禮百神若見紅兒醉中
態也應休憶李夫人

拔得芙蓉出水新魏家公子信才人若教瞥見紅兒
貌不肯留情賦洛神

芳姿不合並常人雲在遙天玉在塵因事愛思荀奉
倩一生閑坐枉傷神

筆底如風思涌泉賦中休謾說嬋娟紅兒若在東家
住不得登牆爾許年

一抹濃紅傍臉斜粧成不語獨攀花當時若是逢韓
壽未必埋蹤在賈家

樹裏西風日半沈地無人跡轉傷心阿嬌得似紅兒
貌不費長門買賦金

五雲高捧紫金堂花下投壺侍玉皇從道世人都不
識也應知有杜蘭香

戲水源头指舊蹤當時一笑也難逢紅兒若爲回桃
臉豈比連催舉五峯

號國夫人照夜璣若爲求得與紅兒醉和香態濃春
裏一樹繁花偃繡幃

知有持盈玉葉冠剪雲裁月照人寒若使紅兒風貌
戴直似瑤池會上看

明媚何曾讓玉環破瓜年幾百花顏若教貌向南朝
見定却梅粧似等閑

世事悠悠未足稱懶將閑事更爭能自從命向紅兒
斷不欲留心在裂繒

自隱新從夢裏來嶺雲微步下陽臺含情一向春風
笑羞殺凡花盡不開

捨却青蛾換玉鞍古來公子苦無端莫言一疋追風
馬天驥牽來也不看

檻外花低瑞露濃夢魂驚覺暈春容憑君細看紅兒
貌最稱嚴粧待曉鐘

薄羅輕剪越溪紋鷓翅低從兩鬢分料得相如偷見
面不應琴裏挑文君

南國東鄰各一時後來唯有杜紅兒若教楚國宮人
見羞把腰身並柳枝

唐詩類苑 卷之三百四十五
照耀金釵簇膩鬢見時直向畫屏間黃姑阿母能判
剖十斛明珠也是閑

輕小休誇似燕身生來占斷紫宮春漢皇若遇紅兒
貌掌上無因着別人

鸚鵡娥如裊露紅鏡前眉樣自深宮稍教得似紅兒
貌不嫁南朝沈侍中

擬將心地學安禪爭柰紅兒笑靨圓何物把來堪比
並野塘初綻一枝蓮

浸草漂花遶檻香最憐穿度樂營墻殷勤留滯綠何
事曾照紅兒一面粧

雕陰舊俗逞嬋娟有箇紅兒賽洛川常笑世人多誑
誕今朝自見火中蓮

渡口諸儂樂未休竟陵西望路悠悠石城有箇紅兒
貌兩漿無因迎莫愁

識向深山識大仙勸人山下引春泉定知不及紅兒
貌枉却工夫漑玉田

傾國傾城總絕倫紅兒花下認真身十年東北看燕
趙眼冷何曾見一人

今時自謂不諳知前代由來事見爲一笑陽城人便
惑何堪教見杜紅兒

唐言類苑 卷之二十四
京口喧喧百萬人競傳河鼓謝星津柰花似雪爭簪
髻今日天容是後身

青史書來未是真可知纖智却狂秦再三爲謝齊王
后要解連環別與人

繡帳鴛鴦對刺紋博山微暖麝微薰詩人若有紅兒
貌悔道當時月墜雲

薄粉輕朱取次施大都端正亦相宜只如花下紅兒
態不藉城中半額眉

粧成渾欲認前朝金鳳雙釵逐步揉未必慕容宮裏
伴舞風歌月勝纖腰

琥珀釵成恩正深玉兒妖惑蕩君心莫教回首勻粧
面始覺曾虛擲萬金

自有閑花一向春臉檀眉黛一時新殷勤爲報梁家
婦休把啼粧賺後人

輕梳小髻號慵來巧中君心不用媒可得紅兒拋醉
眼漢皇恩澤一時回

千里長江旦暮潮吳都風俗尚纖腰周郎若見紅兒
貌料得無心念小喬

月落潛奔暗解攜本心誰道欲單棲還緣交甫非良
偶不肯終身作弄妻

唐詩類苑 卷之二十四
漢皇曾識許飛瓊寫向人間作畫屏昨日紅兒簾下
見大都相似更娉婷

魏帝休誇薛夜來霧綃雲縠稱身裁紅兒秀發君知
否倚檻繁花帶露開

曉日雕梁燕語頻見花難可比他人年年媚景歸何
處長作紅兒面上春

逗玉濺盆浴殿開邀恩先賜夜明苔紅兒若是三千
數多少芳心似死灰

畫簾垂地紫金牀暗引羊車駐七香若是紅兒此中
住不勞烟篠灑宮廊

蘇小輕勻一面粧便留名字著錢塘藏鷓門外諸年
少不識紅兒未是狂

一首長歌萬恨來惹愁漂泊水難回崔徽有底多頭
面費得微之爾許才

昔年黃閣識竒章愛說真珠似窈娘若是紅兒夜深
態便應休說繡衣裳

鳳拆鶯離恨轉深此生難負百年心紅兒若向隋朝
見破鏡無因更重尋

行綰穠雲立駐軒我來猶愛不成冤當時若見紅兒
貌未必形相有此言

唐詩類苑 卷之三百四十一
總是紅兒媚態新莫論千度笑爭春任伊孫武心如
鐵不辦軍前殺此人

煖塘爭赴蕩舟期行唱菱歌著艷詞爲問東山謝丞
相可能諸妓勝紅兒

吳興皇后欲辭家澤國宮臺展絳霞今日紅兒貌傾
國恐須真宰別開花

陌上行入歌黍離三千門客欲何之若教麤及紅兒
貌爭肯樓前斬愛姬

休話如臯一笑時金髻中臆錦離披陋容枉把雕弓
射射盡春禽未展眉

長恨西風送早秋低眉深念嫁牽牛若同人世長相
對爭作夫妻得到頭

謝娘休漫逞風姿未必娉婷勝柳枝聞道只應嘲落
絮何曾得似杜紅兒

總傳桃葉渡江時只爲王家一首詩今日紅兒自堪
賦不須重唱舊來詞

巫山洛浦本無情總爲佳人便得名今日雕陰有神
艷後來公子莫相輕

幾拋雲髻恨金慵淚洗花顏百戰中應有紅兒些子
貌却言皇后長深宮

倚檻還應有所思半開香閣見嬌姿可中得似紅兒
貌若遇韓朋好殺伊

曉向紗牕與畫眉鏡中長欲助嬌姿若教得似紅兒
貌走馬章臺任道遲

鍊得霜華助翠鈿相期朝謁玉皇前依稀似紅兒
貌方得吹簫引上天

重門深掩幾枝花未勝紅兒莫太誇玉柄不能探物
理可能虛上短轅車

前代休憐事可竒後來還出有光輝爭知畫卧紗牕
裏不有神人覆玉衣

羽化嘗聞赴九天只疑塵世是虛傳自從一見紅兒
貌始信人間有謫仙

從道長陵小市東巧將花貌占春風紅兒若是同時
見未必伊先入紫宮

人間難免是深情命斷紅兒向此生何似前時李丞
相枉拋才力爲鶯鶯

鳳舞香飄繡幕風暖穿馳道百花中還綠有似紅兒
貌始得迎將入漢宮

休道將軍出世才盡驅諸妓下歌臺都綠沒箇紅兒
貌致使輕教後閣開

唐詩類苑 卷之三百四十三
馮媛須知住漢宮將身只是解當熊不聞有貌傾人
國爭得今朝更比紅

能將一貌使人迷花艷何須上大堤疎屬便同巫峽
路洛川真是武陵溪

辭輦當時意可知寵深還恐寵先衰若教得似紅兒
貌占却君恩自不疑

三吳時俗重風光未見紅兒一面粧好寫妖嬈與教
看定應休更話真娘

波平楚澤浸星辰臺上君王宴早春畢竟章華會中
客冠纓虛絕爲何人

紅兒不向漢宮生便使雙成漫得名疑是麻姑惱塵
世暫教微步下層城

天碧輕紗只六銖宛風含露透肌膚便教漢曲爭明
媚應沒心情更弄珠

共嗟含恨向衡陽方寸花牋寄沈郎不似紅兒些子
貌當時爭得少年狂

淺色桃花亞短墻不因風起也聞香凝情盡日君知
否還似紅兒淡薄粧

火色櫻桃摘得初仙宮只有世間無凝情盡日君知
否真似紅兒口上朱

唐言類友 卷之三百四十三
宿雨初晴春日長入簾花氣靜難忘凝情盡日君知
否真似紅兒舞袖香
初月纖纖映碧池池波不動獨看時凝情盡日君知
否真似紅兒罷舞眉
濃艷濃香雪壓枝裊烟和露曉風吹紅兒被掩粧成
後含笑無人獨立時
樓上嬌歌裊夜霜近來休數踏歌娘紅兒慢唱伊州
遍認取輕敲玉韻長
金粟粧成扼臂環舞腰輕轉瑞雲間紅兒生在開元
末羞殺新豐謝阿蠻

君看紅兒學醉粧
裁宮纈研裙長誰能更把閒心
力比並當時武媚娘

梔子同心裊露垂折來深恐没人知
花前醉客頻相問不贈紅兒贈阿誰

雲間翡翠一雙飛水上鴛鴦不暫離
寫向人間百般態與君題作比紅詩

舊恨長懷不語中幾回偷淚向春風
還緣不及紅兒貌却得生教入楚宮

一舸春深指鄂君好風從度水成紋
越人若見紅兒面繡被應羞徹夜薰

唐言類文 卷之三十四
花落塵中玉墮泥香魂應上窈娘堤欲知此恨無窮
處長倩城烏夜夜啼

惆悵詩十二首

王之渙

冰蠶薄絮鴛鴦綺半夜佳期並枕眠鐘動紅娘喚歸
去對人勻淚拾金鈿

李夫人病已經秋漢武看來不舉頭得所濃華銷歇
盡楚魂湘血一生休

謝家池館花籠月蕭寺房廊竹颭風夜半酒醒憑檻
立所思多在別離中

隋師戰艦欲亡陳國破應難保此身訣別徐郎淚如

雨鏡鸞分後屬何人

七夕瓊筵往事陳蓼花連蒂共傷神蜀王殿裏三更
月不見驪山私語人

夜寒春病不勝懷玉瘦花啼萬事乖薄倖檀郎斷芳
信驚嗟猶夢合歡鞋

嗚咽離聲管吹秋妾身今日爲君休齊奴不說平生
事忍看花枝謝玉樓

青絲一路墜雲鬟金剪刀鳴不忍看持謝君王寄幽
怨可能從此住人間

陳宮興廢事難期三閣空餘綠草基狎客淪亡麗華

死他年江令獨來時

晨肇重來路已迷碧桃花謝武陵溪山目斷無尋

處流水潺湲日漸西

少卿降北子卿還朔野離觴慘別顏却到茂陵唯一

慟節毛零落鬢毛斑

夢裏分明入漢宮覺來燈背錦屏空紫臺月落關山

遠腸斷君恩信盡工

雜怨

張籍

切切重切切秋風桂枝折人當少年嫁我當少年別
念君非征行年年長遠途妾身甘獨歿高堂有舅姑

山川豈遙遠行人自不返

楚怨

孟郊

秋入楚江水獨照汨羅魂手把綠荷泣意愁珠淚翻
九門不可入一犬吠千門

怨

任蕃

淚乾紅落臉心盡白垂頭自此方知怨從來豈信愁

別離怨

鄭遂初

蕩子戍遼東連年信不通塵生錦步障花送玉屏風
只怨紅顏改寧辭玉簫空繫書春鴈足早晚到雲中

怨回紇歌二首

皇甫冉

唐詩類苑 卷之二百四十一
白首南朝女愁聽異域歌收兵頡利國飲馬胡蘆河
毳布腥膻久穹廬歲月多鵬巢城上宿吹笛淚滂沱

二

祖席駐征棹開帆信候潮隔筵桃葉泣吹管杏花飄
船去鷗飛閣人歸塵上橋別離惆悵淚江路濕紅蕉

代貴公主

李商隱

芳條得意紅飄落忽西東分逐春風去風迴得故叢
明朝金井露始看憶春風

代越公房妓嘲徐公主

李商隱

笑啼俱不敢幾欲是吞聲遽遣離琴怨都由半鏡明

應防啼與笑微露淺深情

代小玉家爲蕃騎所虜後寄集賢裴公相國

韓 渥

動天金鼓逼神州惜別無心學墜樓不得迴眸辭傳
粉便須含淚對殘秋折釵伴妾埋青塚半鏡隨郎莖
杜郵唯有此宵魂夢裏殷勤相覓鳳池頭

獨愁

一作獨怨

孟 郊

前日遠別離今日生白髮欲知萬里情曉卧半牀月
常恐百蟲鳴使我芳草歇

自退

曹 鄴

寒女面如花寂寂常對影况我不嫁容甘為瓶墜井

古意

戎昱

女伴朝來說知君欲棄捐懶梳明鏡下羞到畫堂前
有淚沾脂粉無情理管絃不知將巧笑更遣向誰憐

見秦系離婚後出山居作 劉長卿

豈知偕老重垂老絕良姻郝氏誠難負朱家自愧貧
綻衣留欲故織錦罷經春何況薜蘿綠一作空山不

見人

苦樂相倚曲

元稹

古來苦樂之相倚近於掌上之十指君心半夜猜恨

生荆棘滿懷天未明漢成眼瞥飛燕時可憐班女恩
已衰未有因由相决絕猶得半年伴暖熱轉將深意
諭旁人緝綴疵瑕遣潛說一朝詔下辭金屋班姬自
痛何倉卒呼天府地將自明不悟尋時已銷骨白首
官人前再拜願將日月相輝解苦樂相尋晝夜間燈
光那得天明在主今被奪心應苦妾奪深恩初為主
欲知妾意恨主時主今為妾思量取班姬收淚抱妾
身我曾排擯無限人

與夫嚴灌訣灌以妻無子出之

真氏

唐詩類苑 卷之三百四十三
當時心事已相關
雨散雲收一餉間
便是孤帆從此去
不堪重過望夫山

徒相逢

曹鄴

江邊野花不須採
梁頭野燕不用親
西施本是越溪女
承恩不薦越溪人

貧女

秦韜玉

蓬門未識綺羅香
擬託良媒益自傷
誰愛風流高格調
共憐時世儉梳粧
敢將十指誇偏巧
不把雙眉鬪畫長
苦恨年年壓金線
爲他人作嫁衣裳

絕張生

崔鶯鶯

棄置今何道
當時且自親
還將舊來意
憐取眼前人

贈楊蘊中

死後作

薛濤

玉漏深長燈耿耿
東牆西牆時見影
月明花下子規啼
忍使孤魂愁夜永

唐詩類苑卷第一百四十三

明雲間張之象玄超甫纂輯

雲間張所望叔翹甫編次

雲間王徹叔朗甫補訂

梁谿曹仁孫伯安甫校正

儒部

秀才

酬裴秀才

高適

男兒貴得意何必相知早飄蕩與物求蹉跎覺年老
長卿無產業季子慙妻嫂此事難重陳未於衆人道

唐言類苑 卷之二十四
贈易秀才

李白

少年解長劍投贈即分離何不斷犀象精光暗往時
蹉跎君自惜竄逐我因誰地遠虞翻老秋深宋玉悲
空摧芳桂色不屈古松姿感激平生意勞歌寄此詞

送張秀才從軍

李白

見武部從軍

金門答蘇秀才

李白

君還石門日朱火始改木春草如有情山中尚含綠
折芳愧遙憶永路當自勗遠見故人心平生以此足
巨海納百川麟閣多才賢獻書入金闕酌醴奉瓊筵

屢叅白雲唱恭聞黃竹篇恩光照薄雲漢希騰遷
銘鼎儻云遂扁舟方渺然我留在金門君去臥丹壑
未果三山期遙欣一丘樂棲巖君寂滅處世余龍蠖
良人不同賞永日應閑居鳥鳴簷間樹花落牕下書
綠溪見綠篠隔岫窺紅蕖採薇行笑歌眷我情何已
月出石鏡間松鳴風琴裏得心自虛好外物空頽靡
身世如兩忘從君老烟水

送李策秀才還湖南因寄幙中親故兼簡衡

州李八郎中

劉禹錫

深春風日淨晝長幽鳥鳴僕夫前致詞門有白面生

唐言類考 卷之二十四
攝衣相問訊解帶坐南榮端志見眉睫芳言發精誠
因出懷中文調孤詞亦清悄如促柱絃掩抑多不平
乃言本蜀士世降岷山靈前人秉藝文高視來上京
曳綬司徒府所從信國楨析薪委寶林善響繼家聲
何處翳附郭幾人思却成雲天望喬木風水悲流萍
前與計吏西始列貢士名森然就華禮從使春官卿
帝城岐路多萬足俟晨星茫茫風塵中工拙同有營
寒女勞夜織山苗榮寸莖侯門方擊鐘衣褐誰將迎
弱羽果摧頽壯心鬱怫怫諒無蟠木客聊復蓬累生
昨日訊靈龜繇言利艱貞當求捨拔中必在審已明

誓將息薄遊焦思窮筆精蕤蘭在幽渚安得揚芬馨
日餘摧落者散質負華纓一聆苦辛詞再動伊鬱情
身棄言不動愛才心上驚恨無羊角風使爾化北溟
論罷情益親涉旬忘歸程日携邑中客閑眺江上城
晝惘命金壘宵談轉璿衡薰風香塵尾月露濡桃笙
忽被戒羸驂薄言事南征火雲蔚千里旅思浩已盈
湘江含碧虛衡嶺浮翠晶豈伊山水異適與人事并
油幙侶昆丘粲然疊瑤瓊庾樓見清月孔生多醲醑
復有衡山守本自雲龍亭抗志在靈府發越侔咸英
一揮出滎陽惠彼嗤嗤氓隼旃辭灞水居者皆涕零

唐詩類苑 卷之二十四
誰昔與伊人交歡經宿齡一從雲雨散滋我鄙吝萌
北渚不堪愁南音誰復聽離憂若去水浩蕩無時停
嘗聞祝融峯上有神禹銘古石琅玕姿秘文螭虎形
聖功莫遠服神物擁休禎賢人在其下彷彿疑蓬瀛
君行歷郡齋大袂拂雙旌容遇朗鑒肝鬲可以呈
昔日馬相如臨邛坐盡傾勉君刷羽翰蚤取凌青冥
送豆盧策秀才
韋應物

歲交冰未泮地卑海氣昏子有京師遊始發吳閶門
新黃含遠林微綠生陳根詩人感時節行道當憂煩
古來濩落者俱不事田園文如金石韻豈乏知音言

方辭郡齋榻為一作酌離亭罇無為倦羈旅一去高
飛翻

答馮魯秀才

韋應物

晨坐枉瓊藻知子返中林澹然山景宴泉谷響幽禽
髣髴謝塵跡逍遙舒道心顧我腰間綬端為華髮侵
薄書勞應對篇翰曠不尋薄田失鋤耨生苗安可任
徒令慙所問想望東山岑

答徐秀才

韋應物

鈇鈍謝貞器時秀猥見稱豈如白玉仙一作仙山鶴方與
紫霞升清詩舞艷雪孤抱瑩玄冰一枝非所貴懷書

思武陵

一作懷書且茂陵

送程秀才

司空曙

悠悠多路岐相見又別離東風摧節換
燄燄春陽散楚草漸煙綿江雲亦蕪漫
送子恨何窮故關如夢中遊人盡還北
旅鴈辭南國楓樹幾回青逐臣歸不得
送崔秀才赴上元兼省叔父

韓翃

寒塘斂暮雪臘鼓迎春早疋馬五城人
重裘千里道淮山輕露濕江樹狂風掃
楚縣九醞醲揚州白花好練湖東望接
雲陽女市西遊入建康行樂遠誇紅布

旆風流近睹紫香囊詩家行輩如君少
極目苦心懷謝眺煙開日上版橋南吳岫
青青出林表

燕河南府秀才

韓愈

吾皇紹祖烈天下再太平詔下諸郡國
歲貢鄉曲英元和五年冬房公尹東京
功曹上言公是月當登名乃選二十縣
試官得鴻生羣儒負已材相賀簡擇精
怒起簸羽翮引吭吐鏗轟此都自周公
文章繼名聲自非絕殊尤難使耳目驚
今者遭震薄不能出聲鳴鄙夫忝縣尹
愧慄難爲情惟求文章寫不敢妬與爭
還家敕妻兒具此煎包烹柿紅蒲萄紫
肴果相扶檠

芳茶出蜀門好酒濃且清何能充歡燕庶以露厥誠
昨聞詔書下權公作邦禎文人得其職文道當大行
陰風攪短日冷雨澀不晴勉哉戒徒馭家國遲子榮
廢琴難爲絃南風難爲歌幽幽拙疾中忽忽浮夢多
清韻始嘯侶雅言相與和訟閑每往招祖送柰若何
牽苦強爲贈邦邑光峩峩

同溧陽宰送孫秀才

孟郊

送任齊二秀才自洞庭遊宣城

并序

孟郊

文章者賢人之心氣也心氣樂則文章正心氣非

則文章不正當正而不正者心氣之僞也賢與僞
見於文章一直之詞衰代多禍賢無曲詞文章之
曲直不由於心氣心氣之悲樂亦不由賢人由於
時故今宣州多君子閑暇而寬文章之曲直纖微
悉而備舉洞庭二客勉而客去之鼓其風波之詞
吾知夫樂莫是行也遂爲詩曰

洞庭非人境道路行虛空二客月中下一帆天外風
魚龍波五色金碧樹千叢閃怪如可懼在誠無不通
扣竒驚浩森採異訪穹崇物表積高韻人間訪仙公
宣城文雅地謝守聲問融證玉易爲力辨珉調不同

從茲阮籍淚且免泣途窮

送蹇秀才赴臨洮

高適

悵望日千里如何今二毛
猶思陽谷去莫厭隴山高
倚馬見雄筆隨身唯寶刀
料君終自到勲業在臨洮
閩鄉送上官秀才歸關西別業

岑參

風塵柰汝何終日獨波波
親老無官養家貧在外多
醉眠輕白髮春夢渡黃河
相去關城近何時更肯過
送嚴秀才還蜀

王維

寧親爲令子似舅即賢甥
別路經花縣還鄉入錦城

山臨青塞斷江向白雲平
獻賦何時至明君憶長卿

送孫秀才

王維

帝城風日好况復建平家
玉枕雙紋篔金盤五色瓜
山中無魯酒松下飯胡麻
莫厭田家苦歸期遠沒賒
同吳王送杜秀才應舉入京

李白

秀才何翩翩王許回也賢
暫別廬江守將遊京兆天
秋山宜落日秀木出寒烟
欲折一枝桂還來鴈沼前
送費秀才歸衡州

錢起

南望瀟湘渚詞人遠憶家
客心隨楚水歸棹宿江花

不畏心期阻惟愁面會賒雲天有飛翼方寸佇瑤華

送安都秀才北還

錢起

年少工文客言離却解顏不嗟荆寶退能喜綵衣還
新月來前館高陽出故關相思東北望燕趙隔青山

再寄殷堯藩秀才

許渾

直道知難用經年向水濱宅從栽竹貴家為買書貧
就學多新一作名客登朝盡故人蓬萊自有路休羨武

陵春

送李暝秀才西行

許渾

萬里不辭勞寒裝疊一作雲袍停車山店雨挂席海

門濤鷹勢暮偏急鶴聲秋更高知君北却路留劔泣

黃蒿

送李秀才

許渾

南樓送郢客西郭見荆門鳧鵠下寒渚牛羊歸遠村
蘭舟倚行棹桂酒掩餘樽重此一畱宿前村烟水昏

送張周二秀才謁宣州薛侍郎

權德輿

儒衣兩少年春棹穀溪船湖月供詩興煙嵐費酒錢
上帆投極浦欹枕傲晴天不用愁羈旅宣城太守賢

送李秀才歸江南

韓翃

唐詩類苑 卷之三百四十一
過淮芳草歇千里又東歸野水吳山出家村越鳥飛
荷香隨去棹梅雨點行衣無數滄江客如君達者稀

送韋秀才

韓翃

東人相見罷秋草獨歸時幾日孫弘閣當年謝朓詩
寒山葉落早多雨路行遲好憶金門步功名自有期

送杜秀才東遊

賈島

東遊誰見待盡室寄長安別後

一作夜

葉頻落去程山

已寒大河風色度曠野燒烟殘匣有青銅鏡時將照
鬢看

送盧秀才遊潞府

賈島

雨餘滋潤在風不起塵沙邊日寡文思送君吟月華
過山干相府臨水宿僧家能賦焉長屈他春宴杏花

送薛秀才遊河中兼投任郎中畱後

僧無可

詩苦賦縱橫令人畏後生駕言遊禹跡知已在蒲城

日射雲凝

一作昏

散風吹草未榮孤吟臨寇境莫問請

長纓

送殷秀才南遊

孟郊

詩句臨離袂酒花薰別顏水程千里外岸泊幾宵間
風葉亂辭木雪猿清叫山南中多古事詠遍始應還

夏日送崔秀才

僧無可

南方山水地念子爲貧遊縱是逢佳景那能緩旅愁
夕陽行遠道煩暑在孤舟莫向巴江過猿啼處一作
淚流

送馬秀才

朱慶餘

清貌不識睡見來嘗苦吟風塵歸省日江海寄家心
與鶴期前島隨僧過遠林相於竟何事無語與知音

送薛秀才

皇甫冉

雖是尋山客還同慢世人讀書唯務靜無褐不憂貧
野色春冬樹鷄聲遠近鄰郝公卽吾友知與爾相親

贈薛秀才

韋莊

相辭因避世相見尚兵戈亂後故人少別來新話多
但聞哀痛詔未覩凱旋歌欲結巖棲伴何山好薜蘿
贈許牘秀才

方干

理論與妙用皆從人外來山河澄正氣雪月助宏才
傲世寄漁艇藏名歸酒杯升沈在方寸卽恐起風雷
送段秀才歸澧州

呂溫

湘南孤白芷幽託在清潄豈有馨香發空勞知處深
推賢路已隔賑乏力不任慙我一言分負君千里心
寸義薄聯組片誠敵兼金方期踐冰雪無使弱思侵

厚言類考 卷之二百四十三
酬婁秀才將之淮南見贈之作

柳宗元

遠棄甘幽獨誰言值故人好音憐鍛羽濡沫慰窮鱗
困志情惟舊相知樂更新浪遊輕費日醉舞詎傷春
風月歡寧間星霜分益親已將名是患還用道爲隣
機事齊飄瓦嫌猜比拾塵高冠余肯賦長鋏子忘貧
晚晚驚移律睽携忽此辰開顏時不再絆足去何因
海上銷魂別天邊弔影身祇應西澗水寂寞但垂綸

答杜秀才五松山見贈

李白

昔獻長楊賦天開雲雨歡當時待詔承明裏皆道楊
雄才可觀勅賜飛龍二天馬黃金絡頭白玉鞍浮雲
蔽日去不返總爲秋風摧紫蘭角巾東出商山道採
秀行歌詠芝草路逢園綺笑向人兩君解來一何好
聞道金陵龍虎盤還同謝眺望長安千峰夾水向秋
浦五松名山當夏寒銅井炎鑪歆九天赫如鑄鼎荆
山前陶公矍鑠呵赤電回祿睢盱揚紫煙此中豈是
久留處便欲燒丹從列仙愛聽松風且高臥颼颼吹
盡炎氛過登崖獨立望九州陽春欲奏誰相和聞君
往年遊錦城章仇尚書倒屣迎飛牋絡繹奏明主天
書降問回恩榮骯髒不能就珪組至今空揚高蹈名

夫子工文絕世奇五松新作天下推吾非謝尚邀彦
伯異代風流各一時一時相逢樂在今袖拂白雲開
素琴彈為三峽流泉音從前一別武陵去去後桃花
春水深

贈李粲秀才 字輝冊 僧 鸞

隴西輝冊真才子搜奇探險無倫比筆下銛磨巨闕
鋒胸中靜灑西江水哀絃古樂清人耳月露溥溥激
一作激 秋鬼苔地無塵到曉吟松杉老葉風乾起十
寒哭 軸示余三百篇金碧爛光燒蜀牋雄芒逸氣測不得
使我躑躅成狂顛大郊遠闊空無邊凝明淡綠收餘

烟曠懷相對景何限落日亂岑清倚天又驚大舶帆
高懸行濤擘浪陵飛仙回首瞥見五千仞撲下香爐
瀑布泉何事古人誇八斗焉敢今朝定妍醜颯風驅
雨暫不停始向場中稱大手駿如健鶻鷲與鷗拏雲
獵野翻重霄狐狸竄伏不敢動却下雙鳴當迅颺愁
如湘靈哭湘浦咽咽哀音隔雲霧九疑深翠轉巍巍
仙骨寒消不知處清同野客敲越甌叮噹急響涵清
一作 秋鸞雛相引叫未定霜結夜閑仍在樓高若太
空露雲物片白激清皆鬢髯仙鶴聞從淨碧飛巨鼇
頭戴蓬萊出前輩歌詩唯翰林神仙老格何高深鞭

唐詩類苑 卷之三十四
馳造化繞筆轉粲爛不爲酸苦吟夢乘明月清沈沈
飛到天台天姥岑傾河湧海數百字字字不朽長縱
金此日移一作多君可儔侶堆珠疊璣滿玄圃終日並
轡遊崑崙十二樓中宴王母

贈李秀才是上公孫子

杜牧

骨清年少眼如水鳳羽參差五色層天上麒麟時一
下人間不獨有徐陵

別劉秀才

許渾

三獻無功玉有瑕更携書劍客天涯孤帆夜別瀟湘
雨廣南春期鄠杜花燈照水螢千點滅棹驚鴻鴈一

行斜關河萬里秋風急望見鄉山不到家

余謝病東歸王秀才見寄今潘秀才南棹奉

酬

許渾

酷似牢之玉不如落星山下白雲居春排旋構金門
客夜學兼修玉府書風掃碧雲迎鷺鳥水還滄海養
嘉魚莫將年少輕時節王氏家風在石渠

寄殷堯藩秀才

許渾

十載功名翰墨林爲從知己信沈沈青山有雪諳松
性碧落無雲稱鶴心帶月獨歸蕭寺遠翫花頻醉庾
樓深思君一見如瓊樹空把新詩盡日吟

贈歐陽秀才

劉威

桐上知音日下身道光誰不仰清塵偶來水館逢爲
客舊熟詩名似故人永日空驚滄海闊何年重見白
頭新權門要路應行遍閑伴山夫一夜貧

送崔約秀才

賈島

歸寧髣髴三千星月向船牕見幾宵野鼠獨偷高樹
菓前山漸見短禾苗更深柵鎖淮波疾葦動風生雨
氣遙重入石頭城下寺南朝杉老未乾焦

送竇秀才

朱慶餘

江南才子日紛紛少有篇章得似君清話未同山寺

宿離歌已向客亭聞梅天馬上愁黃鳥澤國帆前見
白雲通籍名高年又少回頭應笑晚從軍

送劉秀才歸江陵

杜牧

綵服鮮華覲渚宮鱸魚新熟別江東劉郎浦夜侵船
月宋玉亭春弄袖風落落精神終有立飄飄才思杳
無窮誰人世上爲金口借取明時一薦雄

寄沈褒秀才

杜牧

晴河萬里色如刀處處浮雲臥碧桃仙桂茂時金鏡
曉洛波飛處玉容高雄如寶劍衝牛斗麗似鴛鴦養
羽毛他日憶君何處望九天香滿碧蕭騷

唐言類苑 卷之二十四 送李秀才歸荆溪

韋莊

八月中秋月正圓。送君吟上木蘭船。人言格調勝玄
度。我愛篇章敵浪仙。晚渡去時衝細雨。夜灘何處宿
寒烟。楚王宮去陽臺近。莫倚風流滯少年。

送陳秀才將遊雪上便議北歸

方干

婆娑戀酒山花盡。繚繞還家水路通。轉櫂擬從青草
岸。吹帆猶似白蘋風。淮邊欲暝軍聲急。洛下先寒苑
樹空。詩句因余更孤峭。書題不合志江東。

鍾陵見楊秀才

羅隱

孺亭滕閣少踟躕。三度南遊一事無。祇覺流年如鳥
逝。不知何處有龍圖。雲歸洪井枝柯斂。水下漳江氣
色麤。賴得與君同此醉。醒醒爭柰被揶揄。

文學

送顧八分文學適洪吉州

杜甫

中郎石經後。八分蓋憔悴。顧侯運鑪錘。筆力破餘地。
昔在開元中。韓蔡同曩曩。玄宗妙其書。是以數子至。
御札早流傳。揄揚非造次。三人並入直。恩澤各不二。
顧於韓蔡內。辨眼工小字。分日示諸王。鈞深法更秘。
文學與我遊。蕭疎外聲利。追隨二十載。浩蕩長安醉。

唐詩類苑 卷之二十四 十五
高歌卿相宅文翰飛省寺視我揚馬間白首不相棄
驂騑入窮巷必脫黃金轡一論朋友難遲暮敢失墜
古來事反覆相見橫涕泗嚮者玉珂人誰是青雲器
才盡傷形體病渴汗官位故舊獨依然危時話顛頭
我甘多病老子負憂世志胡爲困衣食顏色少稱遂
遠作苦辛行順從衆多意舟楫無根蒂蛟鼉好爲祟
况兼水賊繁特戒風颯駛崩騰戎馬際往往殺長吏
子干東諸侯勤勉防縱恣邦以民爲本魚饑費香餌
請哀瘡痍深告訴皇華使使臣精所擇進德知歷試
惻隱誅求情固應賢愚異烈士惡苟得俊傑思自致

贈子猛虎行出郊載酸鼻

同茅郎中使君送河南裴文學

孟郊

河南有歸客江風繞行襟送君無塵聽舞鶴清瑟音
菱蔓綴楚棹日華正嵩岑如何謝文學還起會雲吟

文士

贈文士王雄

鄭谷

知己竟何人哀君尚苦辛圖書長在手文學老於身
公道天難廢貞姿士任真小齋松菊靜願卜子爲隣

宏詞

贈別河南李功曹

宏詞登科拜官

韋應物

耿耿抱私歲寥寥獨掩扉臨觴自不飲况與故人違
故人方琢磨瓌朗代所稀憲禮更右職文翰灑天機
聿一作來自東山群彥仰餘輝談笑取高第綰綬即
言歸洛都遊燕地千里及芳菲今朝章臺別楊柳亦
依依雲霞未改色山川猶夕暉忽復不相見心思亂
霏霏

有道

同長源歸南徐寄子西子烈有道

韋應物

東洛何蕭條相思邈遐路策駕復誰遊入門無與晤

一作出入亦無晤

還因送歸客達此緘中素屢睽心所歡豈

得顏如故所歡不可睽嚴霜晨淒淒如彼萬里行孤

妾守空閨臨觴一長歎素欲何時諧

天長寺上方別子西有道

時任京兆府功曹攝高陵宰別田曹

盧康戶曹韓質因而有作

韋應物

假邑非拙素况乃別伊人聊登釋氏居携手戀一作念

茲晨高曠出塵表逍遙滌心神青山對芳苑列樹遶

一作盈

通津車馬無時絕行子倦風塵今當遵往路佇

立欲何申唯持貞白志以慰心所親

孝廉

送王孝廉覲省

李白

彭蠡將天合姑蘇在日邊寧親候海色欲動孝廉船
窈窕晴江轉參差遠岫連相思無晝夜東泣似長川

送別覃孝廉

韋應物

思親自當去下第未蹉跎家住青山下門前芳草_{一作}
_{水流}多秭歸通遠徼巫峽注驚波州舉年年事還期復

幾何

題樂孝廉書房

耿湣

野情專易外一室向青山業就三編絕心通萬事間

鶯稀春水上草徧暮階間莫道歸繻在來時棄故關

送王使君少子孝廉登科歸省

司空曙

年少通經學登科尚佩觿張憑本名士蔡廓是佳兒
鞍馬臨岐路龍鍾對別離寄書胡太守請與故人知

嗟哉董生行

韓愈

淮水出桐柏山東馳遙遙千里不能休淝水出其側
不能千里百里入淮流壽州屬縣有安豐唐貞元時
縣人董生召南隱居行義於其中刺史不能薦天子
不聞名聲爵祿不及門門外惟有吏日來徵租更索

錢嗟哉董生朝出至夜歸讀古人書盡日不得息或
山而樵或水而漁入厨具甘旨上堂問起居父母不
感感妻子不咨咨嗟哉董生孝且慈人不識惟有天
翁知生神下瑞無時期家有狗乳出求食鷄來哺其
兒啄啄庭中拾蟲蟻哺之不食鳴聲悲徬徨躑躅久
不去以翼來覆待狗歸嗟哉董生誰將與儔時之人
夫妻相虐兄弟爲讐食君之祿而令父母愁亦獨何
心嗟哉董生無與儔

送桂陽孝廉

高適

桂陽少年西入秦數經甲科猶白身卽今江海一歸

客他日雲霄萬里人

明經

送張參明經舉覲省

孟浩然

十五彩衣年承歡戀母前孝廉因歲貢懷橘向秦川
四座推文舉中郎許仲宣泛舟江上別誰不仰神仙
贈廣川馬先生

盧象

經書滿腹中吾識廣川翁年老甘無位家貧懶發蒙
人歸洙泗學歌盛舞雩風願接諸生禮三年事馬融
送五經趙隨登科授廣德尉

韋應物

唐詩類苑 卷之三十四
明經有清秩當在石渠中獨往宣城郡高齋謁謝公
寒原正蕪漫一作夕鳥自西東秋日不堪別淒淒多
朔風

貢士

答貢士黎逢

時在京兆功曹

韋應物

茂等

一作才

方上達諸生安可希栖神澹物表渙汗布

令詞如彼崑山玉本自有光輝鄙人徒區區稱嘆亦

何為彌月曠不接公門但

一作役

驅馳蘭章忽有贈持

用慰所思不見心尚密

一作微密

况當相見時

唐詩類苑卷第一百四十三終

唐詩類苑卷第一百四十四

明雲間張之象玄超甫纂輯

雲間姜雲龍神超甫編次

雲間王徹叔朗甫補訂

梁谿曹仁孫伯安甫校正

儒部

赴舉

赴舉出山畱寄山居鄭參軍

李昭象

還如費冠卿向此振高名肯羨魚鬚美長誇鶴髦輕

理琴寒指倦試藥黑髭生時泰難雲卧隨看急詔行
應舉日寄兄弟 朱可名

廢刈鏡湖田上書紫閣前愁人久委地詩道未聞天
不是燒金手徒拋釣月船多慙兄弟意不敢問林泉
初舉納省卷夢仙謠 沈彬

玉殿大開從客入金桃爛熟没人偷鳳驚寶扇頻翻
翅龍懼金鞭忽轉頭

於簾前獻主文

劉虛白

二十年前此夜中一般燈燭一般風不知歲月能多
少猶著麻衣待至公

夜潛紀長句於都堂西南隅

韋承貽

袞衣博帶滿塵埃獨向都堂納卷回蓬巷幾時聞吉
語棘籬何日免重來三條燭盡鐘初動九轉丹成鼎
未開殘月漸低人擾擾不知誰是謫仙才

又

白雲千朶照廊明一片昇平雅頌聲報道第三條燭
盡南宮風月盡難成

徒步應舉至錢塘之傲船之資久不得濟乃

題詩公館

周匡物

唐詩類苑 卷之二十四
萬里茫茫天塹遙秦皇底事不安橋錢塘江口無錢
過又阻西陵兩信潮

第二舉憶仙謠

白榆風颯九天秋王母朝迴宴玉樓日月漸長雙鳳
睡桑田欲變六鼇愁雲翻簫管相隨去星觸旌幢各
自流詩酒近來狂不得騎龍却憶上清遊

秋賦有期因寄襲美

陸龜蒙

雲似無心水似閑忽思名在貢書間煙霞鹿弁聊縣
著隣里漁舸暫解還芳草病來猶滿篋藥苗衰後卽
離山廣寒宮樹枝多少風送高低便可攀

奉和秋賦有期次韻

皮日休

十載江南盡是閑客兒詩句滿人間郡侯聞譽親邀
得鄉老知名不放還應帶瓦花經汴水更攜雲實出
包山太微宮裏環岡樹無限瑤枝待爾攀

赴舉別所知

李山甫

腰劍囊書出戶遲壯心竒命兩相疑麻衣盡舉一雙
手桂樹只生三兩枝黃祖不憐鸚鵡客誌公偏賞麒
麟兒叔牙憂我應相痛回首天涯寄所思

出試後投所知

羅隱

此去蓬壺兩日程當時消息甚分明桃須曼倩催分

厚言類考 卷之二十四 三
熟橘待洪崖遣始行島外音書應有意眼前塵土漸
無情莫交更似西山鼠啣破愁腸恨一生

逼試投所思

羅隱

桃在仙翁舊苑傍暖煙晴靄撲人香十年此地頻偷
眼二月春風最斷腸曾恨夢中無好事也知囊裏有
仙方尋思仙骨終難得始與回頭問玉皇

魯中送二從弟赴舉之西京

李白

魯客向西笑君門若夢中霜彫逐臣髮日憶光明宮
復羨二龍去才華冠世雄平衢騁高足逸翰凌長風

舞袖拂秋月歌筵聞早鴻送君目千里良會何由同

送李友路秀才赴舉

劉禹錫

爾生始懸弧我坐作上賓引箸舉湯餅祝詞天麒麟
今成一丈夫坎壈愁風塵長裾來謁我自號廬山人
道舊與撫孤悄然傷我情依依看眉睫嘿嘿含悲辛
永懷同年友追想出谷晨三十二君子齊飛凌煙冥
曲江一會時後會已彫淪況今三十載閱世難重陳
盛時一已過來者日日新不如搖落樹重有明年春
火後見琮璜霜餘識松筠肅楓乃獨秀武部亦絕倫
爾今持我詩兩見二重臣成賢必念舊貴保在安貧

清時為情節氣力侔陶鈞乞取斗升水因泛雲漢津
送張惟儉秀才入舉 李嘉祐

清秀過終童攜書訪老翁以吾為世舊憐爾繼家風
淮岸經霜柳關城帶月鴻春歸定得意花送到東中

送孔黨赴舉

皇甫冉

入貢列諸生詩書業早成家承孔聖後身有魯儒名
楚水通滎浦秦山擁漢京愛君方弱冠為賦少年行

送韋秀才道沖赴制舉

劉禹錫

驚禽一辭巢棲息無少安秋扇一離手流塵蔽霜紈
故侶不可追涼風日一寒遠逢杜陵士別盡平生歡

逐客無印綬楚江多芷蘭因居暇遊時長缺不復彈
閱書南軒際絙瑟清夜闌萬境身外寂一杯腹中寬
伊昔玄宗朝冬卿冠鴛鸞肅穆升內殿從容領儒冠
遊夏無措詞陽秋誰不刊至今群玉府學者空縱觀
世人希德門揭若攀峯巒之子向明訓鏘如振琅玕
一旦西上書班上拂征鞍荆臺宿暮雨漢水浮春瀾
君門起天中多士如星攢煙霞雙闕覆抃舞羅千官
清漏宿銅壺仙厨下雕槃熒煌仰金榜錯落濡飛翰
古來才傑士所歎遭時難一鳴從此始相望青雲端

送薛蔓應舉

王建

四海重貢獻珠賚稱至珍聖朝開禮闈所貴集嘉賓
苦生在世間此路出常倫一士登甲科九族光彩新
憧憧車馬徒爭路長安塵萬目視高天昇者得苦辛
況子當少年丈人在咸秦出門見宮闕獻賦待朱輪
有賢大國豐無子一家貧男兒富邦家豈為榮其身
煌煌文明代俱幸生此辰自顧非國風難以合聖人
子去東堂上我歸南澗濱願君勤作書與我山中隣

早送舉人入試

白居易

夙駕送舉人東方猶未明自謂出太早已
有車馬行
騎火高低影街鼓參差聲可憐早朝者
相看意氣生

日出塵埃飛群動互營營營營各何求
無非利與名
而我常晏起虛住長安城春深官又滿
日有歸山情

送孟寂赴舉

孟郊

烈士不憂身為君吟苦辛男兒久失意
寶劍亦生塵
浮俗官是貴君子道所珍況是聖明主
豈乏之證玉臣
濁水無白日清流鑒蒼旻賢愚皎然別
結交當有因

山中送從叔簡赴舉

孟郊

石根百尺杉山眼一片泉倚一作之道
氣高飲之詩
思鮮兼此逍遙場忽奏別離絃却笑薜蘿子
不同鳴

躍年

送皇甫湜赴舉

馬異

馬啼聲特特去入天子國借問去是誰秀才皇甫湜
吞吐一腸文八音兼五色主文有崔李郁郁為朝德
青銅鏡必明朱絲繩必直稱意太平年願子長相憶

送子容進士舉

孟浩然

夕曛山照滅送客出柴門惆悵野中別殷勤醉後言
茂陵余偃息喬木爾飛翻無使谷風誚須令友道存

送丁大鳳進士舉

孟浩然

吾觀鷓鴣賦君負王佐才惜無金張援十上空歸來
棄置鄉園老翻飛羽翼摧故人今在位岐路莫遲迴

送路少府使東京便應制舉

時梁宋初失守

劉長卿

故人西奉使胡騎正紛紛舊國無來信春江獨送君
五言凌白雪六翮向青雲誰念滄洲吏一作史忘機鷗
鳥群

送鄭秀才貢舉

皇甫冉

西去意如何知隨貢士科吟詩向月露驅馬出煙蘿
晚色寒蕪遠秋聲候鴈多自憐歸未得相送一勞歌

送裴秀才貢舉

皇甫曾

儒衣羞此別去抵漢公卿賓貢年猶少篇章藝已成

唐詩類苑 卷之二十四
臨流惜暮景話別起鄉情離酌不辭醉西江春草生
送馬秀才移家京洛便赴舉

劉長卿

自從爲楚客不復掃荆扉劍共丹誠在書隨白髮歸
舊遊經亂靜後進識君稀空把相如賦何人薦禮闈

山中送進士劉蟾赴舉

章孝標

去住跡雖異愛憎情不同因君向帝里使我厭山中
故友多朝客新文盡一作總國風藝精心更苦何患不
成功

送人赴舉

鄭巢

篇章動玉京墜葉滿遙程舊國與僧別秋江罷釣行
馬過隋代寺檣出楚山城應近嵩陽宿潛聞瀑布聲

送人赴舉

僧貫休

兩河兵火後西笑見吾曹海靜三山出天空一鶴高
賃居槐陟屋行卷雪埋袍他日如相見栽桃向海濤

龍州送人赴舉

李洞

獻策赴招攜行宮積翠西挈囊秋卷重轉棧晚峯齊
踏月趨金闕拂雲看御題飛鳴豈回顧獨鶴困江泥

送友人赴舉

朱慶餘

世路

久嗟君進取身十年雖苦志萬里託何人

處困非乖道求名本為親惟應

意先與化龍鱗

送張與赴舉

并引

劉禹錫

古人以借受學為同門友今人以借升名為同年
友其語孰見縉紳者皆道焉予與張與為友人由
是道也曩吾見爾之始生以老成為祝今吾見爾
之成人以未立為憂吾不幸向所謂同年友當其
盛時聯袂齊鑣亘絕九衢若屏風然今來落落如
曙星之相望借曰會合不煩異席可長太息哉然
而尚書右丞衛大受兵部侍郎武庭碩二君者當
時偉人咸萬夫之望足以訂十朋之多也第如京

師無騷騷亦無忻忻爾時秋也吾為若叩商之謳
幸有感夫二君子

祖帳臨周道前旌指晉城午橋群吏散亥字老人迎
詩酒同行樂別離方見情從茲洛陽社吟詠書生

送韓巽入都覲省便赴舉

岑參

槐葉蒼蒼柳葉黃秋高八月天欲霜青門百壺送韓
侯白雲千里連嵩丘北堂倚門望君憶東歸扇枕後
秋色洛陽才子能幾人明年桂枝是君得

送裴處士應制舉

劉禹錫

裴生久在風塵裏氣勁言高為知己注書曾學鄭司

農歷國多於孔夫子往年訪我到連州無窮絕境終
日遊登山日長試蠟屐入洞夏裏披貂裘白帝城邊
又相遇斂翼三年不飛去忽然結束如秋蓬自稱對
策明光宮人言策中說何事掉頭不答看飛鴻彤庭
翠松迎曉日鳳銜金榜雲間出貴腰間傾酒宰
臣委佩觀瑤筆古稱射策如彎弧一發偶中何時無
由來草澤無忌諱努力滿挽當亨衢憶得當年識君
處嘉禾日後聯墻住垂鈎釣得王餘魚踏芳共登蘇
小墓此事今同夢想間相看一笑且開顏老大希逢
舊隣里爲君扶病到芳山

送李群玉赴舉

杜牧

故人別來面如雪一榻拂雲秋影中玉白花紅三百
首五陵誰唱與春風

送趙十二赴舉

杜牧

省事却因多事力無心翻似有心來秋風郡閣殘花
在別後何人更一杯

送錢塘路少府赴制舉

皇甫冉

公車待詔赴長安客裏新正阻舊歡遲日未能消野
雪晴花偏自犯江寒東溟道路通秦塞北闕威儀識
漢官共許郗詵工射策恩榮請向一枝看

送葉秀才赴舉兼呈呂少監

方干

君辭舊里一年期藝至身心亦自知樽盡離人看北
斗月寒驚鵲遶南枝書迴冊市砧應絕棹出村潭菊
未衰與爾相逢終不遠昨聞秘監在台墀

送令狐秀才赴舉

李逢吉

子有雄文藻思繁齟年射策向金門前隨鸞鶴登霄
漢却望風沙是塞垣獨憶忘機陪出處自憐何日繼
飛翻那堪兩地生離緒蓬戶長扃行旅喧

送章碣赴舉

羅隱

萍鹿歌終別酒催粉闈星彩動昭回久經離亂心應
破乍覩昇平眼漸開顧我昔年悲玉石憐君今日蘊
風雷龍門盛事無因見費盡黃金老隗臺

送吳彥榮赴舉

方干

用心精至自無疑千萬人中似汝稀上國纔將五字
去全家便待一枝歸西陵柳路搖鞭盡北固潮程挂
席飛想見明年榜前事當時分散著來衣

句溪夏日送盧霈秀才歸王屋山將欲赴舉

杜牧

野店正紛泊繭蠶初引絲行人碧溪渡繫馬綠楊枝

冉冉跡始去悠悠心所期秋山念君別惆悵桂花時
送王霖赴舉 方干

自古主司堪薦士明年應是不參差須憑吉夢為先
兆必恐長才偶盛時北闕上書衝雪早西陵中酒趁
潮遲郢詵可要真消息只向春前便得知

送晉陵王少府赴舉 方干

相看不忍盡離觴五兩牽風速去檣遠驛新砧應弄
月初程寒角未吹霜越山直下分吳苑淮水橫流入
楚鄉珍重郟家好兄弟明年祿位在何方

送進士韋序赴舉 鄭谷

丹霞照上三清路瑞錦裁成五色毫波浪不能隨世
態鸞鳳應得入吾曹秋山晚水吟情遠雪竹風松醉
格高預想明年騰躍處龍津春碧浸仙桃

送弟子伍秀才赴舉 方干

天遣相門延積慶今同太廟薦嘉賓柳條此日誰攀
折桂樹明年為爾春倚棹寒吟漁浦月垂鞭醉入鳳
城塵由來不要文章得要且文章出衆人

送前進士蔡京赴學究科 劉禹錫

耳聞戰鼓帶經鋤振發聲名自里閭已是世間能賦
客更攻牕下絕編書朱門達者誰能識絳帳書生盡

不如幸遇天官舊丞相知君無翼上空虛

盧秀才將出王屋高步名場江南相逢贈別

杜牧

王屋山人有古文欲攀青桂弄氛氲將攜健筆干明
主莫向山壇問白雲馳逐寧教爭處讓是非偏忌衆
中分交遊話我憑君道除却鱸魚更不聞

御試

御試二首

黃滔

已表隋珠各自攜更從瓊殿立丹梯九華燈作三條
燭萬乘君懸四首題靈鳳敢期翻雪羽洞簫應或諷

金闈明朝莫惜場場醉青桂新香有紫泥

六曹三省列簪裾丹詔宣來試士初不是玉皇疑羽
客要教金榜帶天書詞臣假寐題黃絹宮女敲銅奏
子虛御目四篇酬九百敢從燈下略躊躇

求自試

竇常

仙禁祥雲合高梧彩鳳遊沈冥求自試通鑿果蒙收
文墨悲無位詩書誤白頭陳王抗表日毛遂請行秋
雙劍曾埋獄司空問斗牛希垂拂拭惠感激願相投

放榜

李德裕

唐言類苑 卷之二十四
台庭才子來款扉典校初從天祿歸已慙陋巷迴玉
趾仍聞細雨占綵衣詰朝始趨鳳闕去此日遂歎雞
黍違憶昨謬官在烏府喜君對門討魚魯直廬相望
夜每闌高閣遙臨月時吐昔聞三入承明廬今來重
入中秘書校文復忝丞相屬博物更與張侯居新冠
峩峩不變鐵舊泉脉脉猶在渠忽向情人吐芳訊臨
風不羨潘錦舒憶見青天霞未卷吟翫瑤華不知晚
自憐超足風引舟如何漸與蓬山遠

大中十年顯放榜後謁假覲省於洛生徒餞
長樂驛俄有紀於屋壁云

鄭 顥

三十驂騑一烘塵來時不鎖杏園春楊花滿地如飛
雪應有偷閑曲水人

看榜日

劉 滄

禁漏初停蘭省開列仙名目上清來飛鳴曉日鶯聲
遠變化春風鶴影回廣陌萬人生喜色曲江千樹發
寒梅青雲已是酬恩處莫惜芳時醉酒杯

賀王起

釋廣宣

從辭鳳閣掌絲綸便向青雲領貢賓再闢文章無枉
路兩開金榜絕冤人眼看龍化門前水手放鶯飛谷

口春明日定歸台席去鵲鴿原上共陶鈞

和廣宣作

王起

延英回奉入春闈亦選功夫亦選竒在冶只求金不
耗用心空學秤無私龍門變化人皆望鶯谷飛鳴自
有時獨喜向公誰是證彌天上士與新詩

宣上人遠寄和禮部王侍郎放榜後詩因以

繼和

劉禹錫

禮闈新榜動長安九陌人人走馬看一日聲名遍天
下滿城桃李屬春官自吟白雪詮詞賦指示青雲借
羽翰借問至公誰印可支郎大眼定中觀

和王侍郎酬廣宣上人觀放榜後相賀

元稹

渥洼徒自有權竒伯樂書名世始知竟走墻前稀得
雋高縣日下表無私都中紙貴流傳後海外金填姓
字時珍重劉繇因首薦進士李景述以同判解頭及第為君送和碧
雲詩

時刺華州寄賀王起

周墀

文場三化魯儒生三十餘年振重名曾忝木雞誇羽
翼又陪金馬入蓬瀛雖欣月桂居先折更羨春蘭最
後榮欲到龍門看風雨關防不許暫離營

和周侍郎見寄

王起

貢院離來二十霜誰知更忝主文場楊葉縱然穿舊
的桂枝何必愛新香九重每憶同仙禁六義初吟得
夜光莫道相知不相見蓮峯之下欲徵黃

喜王起侍郎放榜

張籍

東風節氣近清明車馬爭來滿禁城二十八人初上
榜百千萬里盡傳名誰家不借花園看在處多將酒
器行共賀春司能鑒識今年定合有公卿

咸通初恩除歙州途中寄座主王侍郎

忽忝專城奉六條自憐出谷屢遷喬驅車雖覺還家
近捧日惟愁去國遙朱戶昨經新綵戟風帆常覺戀
簞瓢江天夜夜知消息長見台星在碧霄

放榜後和作

丁稜

公心獨立副天心三轄春闈冠古今蘭署門生皆入
室蓮峯太守別知音同升翰苑時名重遍歷朝端主
意深新有受恩江海客坐聽朝夕繼爲霖

放榜後和作

姚鵠

三年竭力向春闈塞斷浮花衆路岐盛選棟梁稱昔
日平均雨露及明時登龍舊美無斜徑折桂新榮盡

直枝莫道只陪金馬貴相期更在鳳凰池

放榜後和作

高退之

昔年桃李以滋榮今日蘭蓀又發生葑菲采時皆有
道權衡分處且無情叨陪鴛鴦朝天客共作門闌出
谷鶯何事感恩偏覺重忽聞金榜扣柴荆

放榜後和作

孟球

當年門下化龍成今日餘波進後生仙籍共知推麗
則禁垣同得薦嘉名桃蹊早茂誇新萼菊圃初開耀
晚英誰料羽毛方出谷許教齊和九臯鳴

放榜後和作

劉耕

孔門頻建鑄顏功紫綬青衿感激同一篋勤勞成大
華三年恩德維嵩楊隨前輩穿皆中桂許平人折
欲空慙和周郎應見顧感知大造竟無窮

放榜後和作

裴翻

常將公道選群生猶被春闈屈重名文柄久持殊歲
紀恩門三啓動寰瀛雲霄幸接鴛鴦盛變化欣同草
木榮乍得陽和如細柳參差長近亞夫營

放榜後和作

樊驥

滿朝簪髮半門生又見新書甲乙名孤進自今開道
路至公依舊振寰瀛雲飛太華清詞著花發長安白

屋榮忝受恩光同上客惟將報德是經營

放榜後和作

崔軒

滿朝朱紫半門生新榜勞人又得名國器舊知收片
玉朝宗轉覺集登瀛同升翰苑三千美繼入花源九
族榮共仰蓮峯聽雪唱欲賡仙曲意怔營

放榜後和作

蒯希逸

一振聲華入紫微三開秦鏡照春闈龍門舊列金章
貴鶯谷新遷碧落飛恩感風雷皆變化詩裁錦繡借
光輝誰知散質多榮忝鴛鴦清塵接布衣

放榜後和作

林滋

龍門一變荷生成況是三傳不朽名美譽早聞喧北
闕頽波今見走東瀛鴛鴦行旣接參差影雞樹仍同次
第榮從此青衿與朱紫升堂侍宴更何營

放榜後和作

李宣古

恩光忽遠曉春生金榜前頭忝姓名三感至公裨造
化重揚文德振寰瀛佇爲霖雨曾相賀半在雲霄覺
更榮何處新詩添照灼碧蓮峯下柳間營

放榜後和作

黃頗

二十二年文教至三千上士滿皇州獨陪宣父蓬瀛
奏方接顏生魯衛遊多羨龍門齊變化屢看雞樹第

名流升堂何處最榮美朱紫環樽幾處酬

放榜後和作

張道符

三開文鏡繼芳聲暗暗雲霄接去程會壓洪波先得
路早陞清禁共垂名蓮峯對處朱輪貴金榜傳時玉
韻成更許下才聽白雪一枝今過却詵榮

放榜後和作

丘上卿

常將公道選諸生不是鴛鴻不得名天上宴同聯步
武禁中麻出滿寰瀛簪裾盡過前賢貴門館仍叨舊
學榮看著鳳池相繼入都堂那肯滯關營

放榜後和作

石貫

重德由來為國生五朝清顯冠公卿風波久作濟川
檝羽翼三遷出谷鶯絳帳青衿同日貴春蘭秋菊異
時榮孔門弟子皆賢哲誰料窮儒忝一名

放榜後和作

李潛

文學宗師心秤平無私三用佐貞明恩波舊是仙舟
客德字新添月桂名蘭署崇資資金
音清羽毛方荷生成力難繼鸞凰上漢聲

放榜後和作

孟宁

科文又主守初時光顯門生濟會期美擅東堂登甲
乙榮同內署待恩私群鶯共喜新遷木雙鳳皆當即

唐言類苑 卷之二十四 日池別有陪深知感士曾經兩度得芳枝

放榜後和作

唐思言

儒雅皆傳德教行幾崇浮俗贊文明龍門昔日波濤
遠禁署同登渥澤榮虛散謬當陪杞梓後先寧異感
生成時方側席徵賢急况說訶謠近帝京

放榜後和作

尤 牢

聖乾文德最稱賢自古儒生少比肩再啓龍門將二
紀兩司鶯谷已三年蓬山皆美成榮貴金榜誰知忝
後先兄弟感恩流涕日但思旌旆碧峯前

放榜後和作

金厚載

長慶曾收間世英果居臺閣冠公卿天書再受恩波
遠金榜三開日月明已見差肩趨翰苑更期連步掌
台衡小儒謬跡雲霄路心仰蓮峯望太清

放榜後和作

王甚夷

春闈帝念玉生成長慶公聞兩歲名有詔赤心分雨
露無私和氣浹寰瀛龍門乍出難勝幸鴛侶先行是
最榮遙仰高峯看白雪多慙屬和意屏營

放榜後和作

盧 肇

高高降得爲時生洪筆三題造化名鳳詔佇歸專北
極驪珠搜得盡東瀛袞衣已換金章貴禁掖曾隨玉

唐詩類苑 卷之二十四 三
樹榮明日定知同相印書衿新列柳間營

放榜日作

韋莊

一聲天鼓闢金扉三十仙材上翠微
葛水霧中龍乍變緱山煙外鶴初飛
鄒陽暖豔催花發太皞春光簇

馬歸迴首便辭塵土世彩雲新換六銖衣

放榜日

黃滔

吾唐取士最堪誇仙榜標名出曙霞
白馬嘶風三十轡朱門秉燭一千家
郊訖聯臂昇天路宣聖飛章奏

日華

其年當日奏試

歲歲人人來不得曲江煙水杏園花

唐詩類苑卷第一百四十四終

